

M E S S A L I N A

أحمد عبد الحميد

رواية

ميسالينا

M I C A L I N A



رواية

# ميسالينا

M I C A L I N A

أحمد عبد الحميد

قناة الكاتب على التليجرام :

[https://t.me/ahmed\\_elhamid](https://t.me/ahmed_elhamid)



أسم العمل : ميسالينا

نوع العمل : رواية

أسم الكاتب : أحمد عبد الحميد

تصميم الغلاف : عيون المها

تنسيق وإعداد : أحمد عبد الحميد

النسخة التي بين ايديكم هي نسخة مجانية ولا يجوز  
قص أو حذف أو تغيير اي شيء منها أو التربح من  
خلالها بأي شكل من الأشكال دون إذن كتابي مسبق  
من الكاتب شخصيا.

ومن يخالف ذلك يعرض نفسه للمسائلة القانونية.



"الجحيم هو الوسام الرفيع الذي يقدمه لك الشيطان مقابل  
خدمتك له"

بيلي صنداي



اهداء

إلي كل روح حاربت شيطان ذاتها قبل أن تحارب  
الشيطان الموكل بوسوستها ..

أحمد عبد الحميد



مصر القديمة - 1465 قبل الميلاد

القصر الملكي في طيبة

وضع الأمير (تحتمس) سيفه في غمده بعد أن تأكد من صلابته وقوته وهو يرتدي زي الفرسان وبجواره يقف الجيش أمام ساحة القصر فاقرب منه كاتبه الشخصي (تجانيني) ثم قال بخشوع :

- سيدي الأمير.. نحن مستعدون للتحرك وقد سجلت على الأوراق كل شيء كما أمرتني.

قال له الأمير تحتمس وهو يربت على حصانه :

- هذا جيد

بعدها لاحظ الأمير تحتمس أن تجانيني مازال واقفا مكانه والتوتر يظهر على ملامح وجهه فسأله تحتمس وقال :

- ما خطبك يا تجانيني ؟

قال تجانيني :

- هل يجب علي حقا أن أتي معكم في تلك الحملة التدريبية ؟ سيدي انا لا علم لي بالحروب أو القتال ، ولا طاقة لي ولا قوة لتحمل تلك الرحلة والأجواء الحارة في الصحراء.

ضحك تحتمس ثم ربت على كتف تجانيني وقال :



- يالك من وغد ضعيف .. اطمئن انت سوف تظل في مأمن بعيدا عن أي مشقة ،  
ماذا بك يا رجل ؟ انا اعتبرك رفيقي قبل أن تكون كاتبي الشخصي الا يجعلك هذا  
تشعر بالغرور أمام زوجتك ؟

ابتسم كاجنيني وقال :

- لي شرف خدمتك وصحبتك يا سيدي .. نحن جاهزون للرحيل الان .  
قال تحتمس وهو ينظر الي القصر :

- اننى لا استطيع التحرك قبل أن تخرج الملكة حتشبسوت لتبارك لنا في حملتنا  
تلك.

هز كاجنيني رأسه في فهم ثم عاد لتفقد حاجياته في العربة الحربية التى خصصت  
له من قبل الأمير تحتمس وبالفعل بعد قليل خرجت الملكة حتشبسوت وحولها  
خدمها ثم سارت الي أن وقفت أمام الأمير تحتمس والذي انحنى إليها في أدب ثم  
وقف في احترام ، فابتسمت حتشبسوت له في حب وقالت :

- تلك هي المرة الأولى التى ترحل فيها خارج أسوار طيبة ولا اعرف اين هي الأرض  
التى سوف تمكث عليها فعندما كنت صغيرا كنت اعلم اين انت وماذا تفعل ، لذا  
ارسل لي دائما وأخبرني بكل شئ ولا ياخذك الكبرياء بانك أصبحت رجلا وقائدا  
للجيش فإنك سوف تظل الابن الذي لم تنجبه احشائي والأقرب دائما الي قلبي ،  
وتذكر يا ولدي إن عرش تلك البلاد هو مصيرك وارثك فكن شجاعا وجسورا  
وعادلا فتطوي بعرشك وسلطانك جميع البلاد.

انحنى الأمير تحتمس بأدب أمام الملكة حتشبسوت ثم انصرف وامتطى جواده في  
قوة وسار امام جيشه متجه الي أكبر حملة تدريبية تشهدها البلاد.



في مكان ما في الصحراء وبعد أن مر يومان على التدريبات المكثفة التي أعدها الأمير تحتمس ليختبر فيها قواته ويطور من كفاءتها العسكرية، وفي واحة ظليلة غلبه النعاس تحت نخلة مثمرة سقطت إحدى ثمارها عليه وهو نائم فأفاق من غفوته ليفاجأ بوجه عجوز يحدق فيه عن قرب.

انتفض تحتمس وقال:

- من أنت؟

قال الرجل وسط تجاعيد وجهه الكثيرة:

- أنا من يعرف سرك، أنا مرسل الملوك السابقين، أكشف لك ما لا تعرفه وما لا يعرفه عنك البشر

صمت تحتمس ولم يعرف ماذا يقول وكان العجوز يتأمل وجه تحتمس قليلا ثم قال:

- إن مثلك يا ولدي لا يتكرر إلا كل بضعة قرون من الزمان.

تسمر تحتمس في مكانه بينما واصل الرجل حديثه وقد بدا وكأنه يردد ما يملأ عليه:

- انك ستقطع المسافات كالخيل الراحمة وتجتاز الرمال كالجمال الهادرة وتعبير المياه كالأسماك السابحة وسيكون لك في كل ذلك سرعة الطيور الجارحة.

ثم ابتسم العجوز وقد ظهرت أسنانه النخريه وخيل لتحتمس أنه يهزأ به وهو يقول:

- أما خارج الحروب فمثلك مثل جنودك البسطاء لا ميزة لك عليهم.

نهض تحتمس بسرعة وأراد أن يمسك بالرجل لكنه اختفى وكأنه وجه خرج من سراب الصحراء ثم اختفى بين الكشبان الرملية، أو أنه طيف من وحي النوم فعاد





مسرعا الى تجمع الجنود وهو يبحث عن (تجانيني) كاتبه الشخصي.

\*\*\*

بعد مرور سبعة سنوات كانت مدينة مجدو استسلمت بلا قيد ولا شرط بعد أن تمكن ملك مصر العظيم تحتمس من هزيمة قوات قادش التي فوجئت بالجيش المصري ينقض عليها من أضعف نقاط استحكاماتها، فمن هذا المضيق تجمعت القوات المصرية خلف إحدى هضاب الجبل إلى أن اكتمل عددها فصعدت الهضبة ومن هناك انهمرت كالشلال الهادر على قوات العدو التي فر أفرادها إلى مدينة مجدو هربا من جيش تحتمس المارد الجبار. ، فدخلتها القوات المصرية في بداية تأسيسها لإمبراطورية امتدت إلى سائر المدن المجاورة وغير المجاورة. وفي القصر بمدينة مجدو جلس تحتمس الثالث على عرش المدينة وبجواره على كرسي صغير جلس الكاتب الخاص (جانتيني) الذي لم يفارقه قط ، وبعد أن عرض قادة الجيش قائمة بجميع العتداد والغنائم الذي حظوا بها بعد المعركة أمرهم بالانصراف وان يحتفل الجنود بالانتصار مع أخذ الحيلة وأن يقف حراس متأهبين دائما على مداخل ومخارج المدينة ومن لا يريد الاحتفال فليذهب ويرتاح تلك الليلة .

بعد إخلاء قادة العرش من قادة الجيش والخدم نظر تجانيني الى الملك تحتمس وقال باحترام :

- مبارك لك النصر يا سيدي .

ابتسم له تحتمس وقال :

- مبارك لنا جميعا يا تجانيني .. لقد اعتقدت قوات قادش أنهم سوف يهزموننا



بسهولة .

قال تجانيبي :

- لقد كانت خدعة مأكرة منك يا سيدي الملك .. من كان يتوقع أن جيشنا سوف ينقض عليهم من أضعف نقاطهم.

ضحك تحتمس الثالث وقال :

- نعم كانت خدعة مأكرة اهتزت لها قلوبهم بسببها .. لكن أيضا الحصار كان قويا ومرهقا في نفس الوقت .. لقد كان الحصار لمدة ثمانية أشهر وهو وقت طويل .

قال تجانيبي :

- لقد ارهقتهم يا سيدي ومنعت عنهم الإمدادات وقطعت عنهم كل السبل ودخولك لتلك المدينة هو نصر عظيم .

ربت تحتمس على كتف تجانيبي بحب ثم وقف فوق تجانيبي خلفه فابتسم تحتمس له وقال :

- اتعلم يا تجانيبي .. أعتقد أن نبوءة الرجل العجوز كانت صحيحة.

قال تجانيبي :

- سيدي الملك .. أن كانت النبوءة صحيحة ، فهذا لا يقلل من شأنك ، انا اعرفك منذ صغرنا يا سيدي وكم اعلم أن الملك تحتمس يحظى بالذكاء والشجاعة والقوة وتلك الصفات ليست غريبة عنك فإنها تجري في دمائك وارث موروث من أجدادك العظماء.

ابتسم تحتمس وقال :

- حسنا .. أخبرني الآن لماذا لم تذهب للاحتفال ؟



قال تجانيبي:

- في الحقيقة يا سيدي كنت انتظر الي أن ينتهي عملي وكنت سوف اذهب.  
هز تحتمس رأسه في فهم ثم قال :

- حسنا لقد انتهيت من عملك .. اذهب الان الي الاحتفال .

قال تجانيبي:

- فليسمح لي سيدي .. لكني كنت اريد الاحتفال بطريقتي الخاصة ؟  
نظر له تحتمس متسائلا وقال :

- وما هي طريقتك تلك ؟

قال تجانيبي:

- كنت اريد السير في المدينة وتفقد أحوالها ومبانيها واناسها .. أنها مدينة جديدة  
لم اراها من قبل .

قال تحتمس :

- لك هذا يا تجانيبي

ثم خلع الملك تحتمس خاتما صغيرا من اصبع يده وأعطاه الي تجانيبي وقال :

- بهذا الخاتم سوف يفتح لك اي باب بالمدينة وان اعترضك الحراس فدعهم يرون  
هذا الخاتم .. ولا تخبر أحدا من أهل المدينة انك تجانيبي الكاتب الخاص بالملك  
حرصا على حياتك واسرارنا العسكرية .. وإذا وقعت في المتاعب فأذهب فورا الي  
اقرب جنودنا وهم سيتكفلون بالباقي.

قال تجانيبي وهو يرتدي الخاتم :

- حسنا يا سيدي الملك.



في وقت الغروب وبين شوارع المدينة سار تجانييني وهو يرتدي ملابس تشبه ملابس أهل المدينة في محاولة لإخفاء شخصيته المصرية حتى يستطيع التوغل وسط أهل المدينة ، وكانت الأسواق على وشك الإغلاق وكانت المدينة منظمة ونظيفة لكن الناس كانوا يعانون من الهزل والضعف بسبب قلة الطعام الذي كان بسبب الحصار لذا أصر تجانييني أن يخبر الملك تحتمس بهذا الأمر ، فإنه ملك عادل ولن يسمح بجوع وموت هذا الشعب خاصة أنه أصبح الآن جزء من امبراطوريته الواسعة ، وفي إحدى الشوارع الصغيرة سمع تجانييني صراخ امرأة وحينما وصل إلى مصدر الصوت وفي الظلام وجد جنديين مصريين يمسكون بامرأة وينهالون عليها بالسب والإهانة ، فذهب إليهم تجانييني ووبخهم بقوة إلا أن أحد الجنود قال له في شجاعة :

- ابتعد انت ايها الرجل .. أنه ليس من شأنك

هنا نظر له تجانييني بقوة ثم أراه الخاتم الذي بيده ، وما أن رآه الجندي حتى فهم أن هذا الخاتم هو للملك فوقف باحترام وقال :

- عفوا يا سيدي .. لكن تلك المرأة لصة .. لقد أخذت مننا أموال لكي نذهب معها لقضاء وقت ممتع لكنها فجأة أخبرتنا أن لديها عذرا يمنعها عن هذا وعندما طلبنا منها استرداد أموالنا اخذت تصرخ وحينها حضرت انت .

قال تجانييني :

- اذهبوا الان وانا سوف احضر لكم أموالكم .

ذهب الجنديين وهم ينظرون إلى المرأة بغیظ فنظر لها تجانييني وقال :

- ما اسمك ؟



اخذت المرأة ترتب ملابسها على جسدها ثم قالت بشئ من الضيق :

- وما شأنك انت بأسمي ؟

قال تجانيني :

- لقد سرقت الجنود وكان يمكنني تركك لهم الي أن يقتلوك

قالت المرأة :

- وهل تريد مني رد الجميل ؟

هز تجانيني رأسه موافقا فضحكت المرأة وقالت :

- أنهم اخبروك أنني لدي عذرا .

ابتسم تجانيني :

- وهم أدركوا أنها خدعة وانا ايضا أدرك هذا ... ولكن هذا ليس بطلبي أنني اريد

منك أن تقبلي دعوتي على العشاء .

قالت المرأة :

- العشاء فقط ؟!

قال تجانيني :

- نعم .. العشاء فقط

قالت المرأة وهي تستعد للسير :

- حسنا .. تعال .. انا اعرف مكانا جيد.

\*\*\*

داخل المطعم الصغير جلس تجانيني وهو ينظر إلى المرأة والتي أصبحت ملامحها

الجميلة واضحة أمامه على نيران المشاعل المتناثرة على الجدران ، لقد كان شعرها

البنّي ناعم منسدل على وجنتيها وكتفها وعيونها السوداء مكحلة لتبرز جمال



أكثر ، بيضاء البشرة ، ممتلئة بالأنوثة التي تبرز من تحت ثيابها.  
سألته المرأة وقالت :

- هل لك علاقة بالجيش المصري ؟

قال تجانيني :

- لا .. انا تاجر فقط .. وقد استطعت أن اعاهد ملك المصريين بخدمته ومقابل  
هذا العهد اعطاني هذا الخاتم هدية.

هزت المرأة رأسها في فهم وقالت :

- وهذا سبب انصراف الجنود .. لكن يجب أن تعلم بأني لن اعطيك الأموال التي  
اخذتها منهم.

شرب تجانيني بعض المياه من الإناء الفخار بعد أن انتهى من طعامه وقال :

- انا لم أسألك عن تلك الأموال ، ولا اريد استردادها منك.

انتهت المرأة من تناول الطعام وقالت :

- هل انت متزوج ؟

هز تجانيني رأسه نافيا فقالت المرأة :

- انا تزوجت منذ خمسة سنوات لكنه كان وغدا وتركني وذهب .

قال تجانيني :

- من يترك هذا الجمال هو لو غدا حقا .

ضحكت المرأة وقالت :

- اراك لطيفا يا هذا .. أخبرني انا لا أعلم اسمك

ابتسم تاجيني وقال :



- وانا ايضا لا أعلم اسمك .

ابتسمت المرأة وقالت :

- حسنا .. سوف اخبرك بأسمي لكن ليس هنا.

قال تجانيني متسائلا :

- اين ؟

قالت المرأة :

- في منزلي ..

\*\*\*

قبل شروق الشمس كان تجانيني واقفا يرتدي ملابسه وكانت المرأة نائمة على السرير

الخشبي البسيط عارية لا يستر جسدها الفاتن إلا قطعة قماش كبيرة ، وما أن

شعرت بحركة تجانيني حتى استيقظت من نومها وقالت :

- هل ستغادر الان ؟

قال تجانيني وهو يصلح ملبسه :

- نعم .. يجب علي المغادرة الان .. هناك أمورا هامة يجب أن انهيها.

وقفت المرأة عارية وسارت الي أن أصبحت امام تجانيني وقالت وهي تلمس جسدها

بنعومة :

- هل هناك أمورا اهم مني ومن هذا الجسد الذي يشتااق إليك.

قال تجانيني وهو يتمالك نفسه :

- هناك بعض الأعمال البسيطة التي سوف انهيها وبعدها اعود اليك.

ثم قبل وجنتيها واستعد للمغادرة ، لكن هناك بالقرب من الباب لاحظ جانتيني



تمثالا غريبا لم يلاحظه طوال فترة وجوده ، كان التمثال بجسد مشعر ورأس أسد  
مع أسنان بارزة حادة وأذني حمار ، وأصابع وأظافر طويلة وأقدام طير مع مخالب ،  
سألها تجانيني وقال :  
- ما هذا ؟

ابتسمت المرأة وقالت :  
- أنها الربة لاماتشو .. يجب أن نعبدها حتى نتجنب شرها فهي شريرة تفترس  
الصغار حديثي الولادة ومن لم يولدوا بعد.  
قال لها تجانيني :

- أنها لربة شريرة حقا .. اعتقد انها شيطانة وليست ربة  
ابتسمت المرأة وقالت :  
- لقد احتفظت بها حينما كنت متزوجة على أمل ان انجب واتجنب شرها لكن  
بعد أن تركني زوجي نسيت أمر هذا التمثال .. سوف اتخلص منه قريبا.  
هز تجانيني رأسه في فهم ثم تذكر شيئا وقال :  
- الم تخبريني باسمك بعد ؟

ضحكت المرأة ثم اقتربت من تجانيني وهمست له باسمها ، فابتسم تجانيني وقال :  
- أنه اسم جميل كصاحبته .. سوف اذهب الان وفي الليل سوف آتي اليك.

\*\*\*

مرت ثمانية أيام ولم يستطع تجانيني الذهاب الي عشيقته مرة أخرى فقد بدأت أمور  
غريبة تحدث في المدينة ، ففي كل ليلة كان يعثر على أشلاء لجثث لجندي أو جنديين  
من جنود المصريين وايضا اختفاء العديد من الأطفال الرضع من أطفال المدينة ما





جعل المدينة تعيش في رعب وهلع وهذا ما جعل الملك تحتمس يستشيط غضبا  
ويصر على الوصول الى فاعل هذه الأمور الشنيعة والقضاء عليه .

وفي تلك الليلة تفاجأ حراس القصر بامرأة تأتي إليهم بسرعة بصحبة جنديين  
مصريين آخرين وتخبرهم بأن رضيعها تم خطفه من امرأة وهي تعرف أين مكانها  
وترجو مقابلة الملك فوراً ، هنا أمر الملك تحتمس بإعداد قوة عسكرية وذهب مع  
المرأة بصحبة تجانيني ليوثق كل شئ رآه في تلك الحملة .

أثناء السير كان تاجنيني يشعر بأنه سار في هذا الطريق من قبل ، بل هو نفس  
الطريق فأخذ يسأل المرأة أن كانت متأكدة أنه هذا الطريق هو الطريق الصحيح  
لمنزل المرأة التي خطفت ابنها فأكدت له أنه هو الطريق الصحيح وأنها تعرف المنزل  
جيذا ، وبالقرب من إحدى المنازل أشارت ام الرضيع الى المنزل الذي يتواجد به  
ابنها ، وهنا وقع قلب تاجنيني عند قدميه .  
أنه هو المنزل ..

أنه منزل عشيقته ..

هنا أمر الملك تحتمس جنوده بدخول المنزل عنوة وبالقوة ، ودخل معهم تاجنيني  
ليجد عشيقته واقفة عارية تماما يغطي الدماء جسدها بالكامل وجسد جندي  
مصري ممزق على الأرض الى أشلاء ، وطفل رضيع يبكي على السرير .

دخل الملك تحتمس وحينما رأى هذا المشهد أمر جنوده بقتلها وقطع رأسها  
فانهالت السيوف عليها وقطع رأسها ، فاقرب تاجنيني من الرأس المقطوع وهو  
ينظر لها في صدمة وعينيه ممتلئة بالدموع لا تجرأ على النزول حزنا على ما حدث له  
وللخدعة التي تعرض لها ، ولم يشعر بشئ الا بصوت ام الرضيع وهي تشهق في فزع



، فنظر لها الجميع وهي تحمل رضيعها وتتفحص ملابس المرأة القاتلة الموجودة بجوار التمثال فسأها الملك تحتمس وقال :

- ماذا هناك يا امرأة ؟

فقالت المرأة وهي تلقي بالملابس على الأرض في خوف وتحتضن طفلها في قوة :  
- أن تلك الملابس هي ملابس كهنة لاماتشو .. وكهنة لاماتشو توقفوا عن عبادتها منذ قديم الأزل بسبب شرها .

قال تحتمس وهو ينظر إلى أحد الجنود :

- أحرقوا هذا المنزل فوراً و ....

لكن قبل أن يكمل الملك تحتمس حديثه بدأت ريحة لحم يتم شواءه تظهر في الأنوف فلاحظ الجميع بدخان اسود يخرج من جسد المرأة القاتلة ، ففرغت ام الرضيع واحتضنت طفلها بقوة أكبر وخرجت من المنزل مسرعة بعد أن قالت :  
- أنها ليست كاهنة .. أنها لاماتشو نفسها .. أن الشيطانة تهرب من الجسد هنا أسرع أحد الجنود وأخذ مشعل كان موجود في ركن الغرفة والقاءه على جسد المرأة الشيطانة فاشعلت النار في الجسد وبدأ يصدر من الجسد صوت نحيب ، فأمر تحتمس أن يتم إشعال النار في المنزل بأكمله .

خارج المنزل وقف تحتمس وبجواره تجانيني وخلفهم الجنود وهم ينظرون إلى المنزل المشتعل وصوت صراخ الشيطانة يعم الإرجاء ، فسمع تحتمس أحد الجنود وهو يقول :

- أن تلك الشيطانة تموت .

فقال تحتمس :



- أن أهل تلك المدينة يقولون ان النار لا تقتل تلك الشيطانة بل تضعفها فقط  
وتعذبها وحتما سوف تعود في جسد آخر.

فقال تجانيني:

- ولا يجب على أي رجل أن يثق بأي امرأة لا يعرف عنها شيء وخاصة أن اغرتك  
بمفاتها.

\*\*\*



مصر - 2018

القاهرة

طرق وليد باب مكتب مدير التحرير عدة طرقات خفيفة ثم دخل وهو يبتسم الى  
الاستاذ يحيى مراد مدير تحرير جريدة الوسام وصاحبها وبعد أن صافحه جلس على  
الكرسي وقال :

- خير يا فندم .. عم شعبان بتاع البوفيه قالي أن حضرتك عايزني.  
قال يحيى :

- قولي يا وليد .. انت شغال عندنا بقالك كام سنة؟  
تمعن وليد في سؤال مدير التحرير ثم قال :

- حوالي 3 سنين ، بس ليه السؤال ده يا فندم ؟  
قال يحيى :

- لأن حضرتك اكيد عارف ان الجريدة بتاعتنا بتكتب عن كل صغيرة وكبيرة ،  
وحضرتك لحد دلوقتي مكتبتش ولا حرف عن جريمتين القتل الي حصلوا  
الاسبوعين الي فاتوا .  
قال وليد :

- يا استاذ يحيى .. ايه الي هتستفاده الجريدة من خبرين مش عارفين عنهم  
حاجة ؟ .. وبعدين انا شغال عليهم كويس وان شاء الله اول الاسبوع الجاي هتلاقي  
تقرير كامل ومفصل لكن الحكاية محتاجة وقت خصوصا أن الشرطة مش عاوزة



تتطلع اي بيانات بخصوص حساسية الجرائم دي ، حتى الشخصيات الي اتقتلت  
مش معروفة لحد ، الموضوع شكله سري جدا وحساس كمان.  
قال يحيى :

- طيب .. حاول بقدر الإمكان أنك تعرف تفاصيل وعاوز منك تقرير تنشره يكون  
قوي وجذاب علشان القراء  
قال وليد مبتسما :

- حاضر يا فندم .. بس ياريت حضرتك ....  
هنا طرق الباب عدة طرقات وبعدها دخلت عبير بجماها الجذاب وبجسدها  
الممشوق فابتسم لها يحيى وقال لها مرحبا :  
- اهلا بالعسل بتاعنا

فابتسمت عبير في خجل وقالت بأدب وهدوء وهي واقفة :  
- حضرتك كنت عاوزني يا فندم .  
قال لها يحيى :

- طيب اقعدى الاول .  
قالت عبير :

- معلش يا فندم عندي تقرير مهم بكتبه وعاوزه الحق اوديه المطبعة علشان  
ينزل بكرة

نظر يحيى الي وليد وقال معاتبا :  
- شايف الناس الي قلبها على الشغل .



ثم نظر إلى عبير وقال :

- عاوزك تكتبي تقرير كامل عن المقبرة الفرعونية الي اكتشفوها اول امبارح.

قالت عبير :

- لكن انا يا فندم معنديش خلفية تاريخية كبيرة اقدر اكتب من خلالها التقرير ده.

قال يحيى :

- عارف يا ستي .. علشان كده انا استعنت بدكتورة من كلية الآداب قسم تاريخ ، هي ست مشهورة جدا ومعروفة في الوسط ده ، هي اسمها عادة الفيومي هي ممكن تجيلك النهاردة في المكتب وهتساعدك كويس.

هزت عبير رأسها في فهم ثم استأذنت وغادرت في هدوء أمام وليد ويحيى الذي لم تنزل عينيه عن جسد عبير وهو يتمنى داخل نفسه بأشياء لا يستطيع فعلها على أرض الواقع وأخذت التخيلات تجعل لعبه يسيل أمام شهواته الجنسية الي أن قاطعه وليد وهو يقول بعد أن لاحظ نظرات يحيى الي جسد عبير :

- انا بستأذن حضرتك تصرفلي منحة اقدر اصرف بيها على التحريات والتحقيقات علشان التقرير.

فنظر له يحيى بعد أن آفاق من تخيلاته :

- ها ؟ .. بتقول ايه يا وليد ؟!

قال وليد وهو يتمالك نفسه من أفعال مدير التحرير :

- كنت بقول عاوز فلوس .



قال يحيى متذمرا :

- فلوس .. فلوس .. فلوس ... روح يا سيدي خد من الحسابات الفلوس الي انت عايزها.

\*\*\*

داخل مكتب المحررين جلس وليد على مكتبه بعد أن وجد أن زملاؤه غير موجودين بمكاتبهم ثم أخرج بعض الأوراق وأخذ يخط بعض الكلمات وبعد قليل دخل ايمن وهو يقول :

- انا هتشل .. اكيد انا هتشل قريب.

ضحك وليد وقال :

- ايه الي حصل ؟

جلس ايمن على المكتب المجاور لمكتب وليد وقال بغیظ :

- تخيل يا مؤمن .. تخيل اروح علشان اعمل لقاء مع فنانة اول مرة تمثل وتظهر

في عمل فني وتتزوج عليا وتقولي تعالى بكرة ، هو انا رايع اشحت منها بنت

الموكوسه؟ ، امال لو مكنش الفيلم درجة تانيه وساقط اساسا كانت عملت فيا ايه ؟

ضحك وليد أكثر وقال وهو يستمر في الكتابة :

- معلشي يا صاحبي ، هي الي دافعة للجريدة علشان تعمل اللقاء ده.

قال أيمن باستغراب وهو يضرب يدا بيد :

- لا حول ولا قوة الا بالله.. كمان هي الي دافعه!!؟

بعد قليل دخلت امرأة وسالت ايمن قائلة :

- فين مكتب الأستاذة عبير ؟



قال أيمن :

- مين حضرتك ؟

قالت المرأة بثقة ممزوجة بالتواضع :

- انا غادة الفيومي .. دكتورة ...

وقبل أن تكمل حديثها وقف وليد مرحبا بها بعد أن تذكرها وتذكر حديث مدير

التحرير بشأنها مع عبير وقال :

- اهلا يا دكتورة .. اتفضلي ارتاحي .. هي عبير موجودة هتلاقيها بتجيب حاجة من

البوفيه.

شكرته غادة وجلست أمامه على الكرسي وبعد قليل جاءت عبير فرحبت بالدكتورة

غادة وطلبت منها الجلوس معها على مكتبها الخاص وهناك بدأت عبير المناقشة

معهما بخصوص المقبرة الفرعونية التي تم اكتشافها حديثا .

بعد قليل دخلت هناء بنظارتها الطبية وجسدها النحيف وبعد أن ألقت التحية

على الجميع اقتربت من وليد وقالت في همس :

- سمعت عن حالة القتل الجديدة الي حصلت ؟

قال وليد هامسا :

- لا .. هي دي حصلت امتي ؟

قالت هناء :

- لاقوا أشلاء الجثة النهاردة الصبح .. وعارف فين ؟

قال وليد :

- فين ؟





قالت هناء :

- على بعد 300 متر من المقبرة الفرعونية الي اكتشفوها اول امبارح.

اقترب منهم ايمن الذي كان يتجسس على حديث هناء مع وليد وقال :

- انتي عارفة مين الي قاعدة مع عبير دي ؟

قالت هناء دون النظر إلي مكتب عبير :

- طبعا أعرفها ... دي الدكتورة غادة ممدوح الفيومي .. بنت لواء الشرطة المتقاعد

ممدوح الفيومي ، وزوجة النقيب طه عبد السلام الشرييني ظابط في الأمن الوطني .

شهق ايمن باستغراب مما قالته هناء ثم قال :

- عرفتي ده كله ازاي ؟! يخربيت امك.

لوحث هناء يديها له بسبب اسلوب حديثه الدنيء ، فوكزه وليد في قوة وهو يقول :

- ما تبطل قلة ادب بقى واحترم نفسك.

قال أيمن مبررا :

- معلشي يا جماعة انا اسف ... بس انتوا عارفين معناه ايه الكلام ده ؟

قال وليد :

- معناه أن الدكتورة الي قاعدة قودامنا دي عندها مفاتيح ممكن تساعدنا.

وقف وليد مسرعا ثم سار الي أن وصل إلي مكتب عبير وجلس امام غادة وخلفه

وقفت هناء اما ايمن فسحب كرسي وجلس بجوار عبير التي كانت متفاجئة مما

يحدث حولها ، فقال وليد موجه حديثه الي غادة :

- كنا عاوزين نسأل حضرتك كام سؤال لو تسمحي يا دكتورة ؟

قالت غادة وهي تبتسم ابتسامه هادئة وقالت :



- ما انا بتكلم مع الأستاذة عبير زميلتكم.

قال أيمن :

- احنا عارفين ده يا دكتورة ، بس احنا سألنا بخصوص الجثة الي لاقوها قريبة من المقبرة الي اكتشفوها من يومين .

ثم نظر ايمن الي عبير وقال بطريقة مشاغبة :

- مساء الخير .. ايه اخبارك.

لم تجبه عبير بل اکتفت بالنظر الي الاوراق التي أمامها في حين قالت عادة:

- انا مالي ومال القضية دي ؟ انا جاية علشان اتكلم في حاجة محددة.

قالت هناء بود :

- بصي يا دكتورة احنا عارفين أن زوج حضرتك النقيب طه ظابط في الأمن الوطني واكيد عنده خلفية عن القضية دي .

قالت عادة بهدوء :

- للأسف انا معرفش حاجة عن القضية دي .. وجوزي النقيب طه مش بيحكي لي عن حاجة تخص شغله.

قال وليد :

- طيب يا دكتورة خلينا نسالك من اختصاص شغلك ؟

قالت عادة :

- لو من اختصاص شغلي .. مفيش مشكلة لو هقدر اقدر اساعد.

قال وليد :

- تفتكري الي حصل للجثة يكون سببها لعنة الفراعنة ؟



قالت هناء :

- اصل احنا عرفنا أن الجثة لاقوها أشلاء ومتقطعة وكانت على بعد 300 متر من المقبرة.

قالت غادة :

- انا عن نفسي مش مؤمنة بحاجة اسمها لعنة الفراعنة ، لكن مؤمنه أن لكل حاجة بتحصل هتلاقي ليها سبب

قال وليد :

- طيب هل صاحب الجثة من الناس الي اكتشفوا المقبرة ؟

قالت غادة بعد تفكير :

- اعتقد برضه لأ.. لانه لو كان حد من الي اكتشفوها كنت عرفت.

قالت هناء :

- طيب مين صاحب المقبرة دي ؟

قالت غادة:

- صاحب المقبرة كاتب مصري قديم اسمه تجانيني وكان الكاتب الخاص للملك تحتمس الثالث.

قال أيمن باندهاش مبالغ ليلفت نظر عبير :

- واااو.. تحتمس الثالث الي كان عامل عداوة مع حتشبسوت بسبب حكم مصر.

قالت غادة :

- حتشبسوت مكنتش عدوة للملك تحتمس .. ده غلط تاريخي ، حتشبسوت قبل ما

تكون مرات أبوه كانت عمته لأنها اتجوزت من أبوه تحتمس الثاني الي هو اخوها



من الاب مش من الام وده كان التقليد الرسمي وسط ملوك مصر القديمة أن الملك يتجوز أخته ، ده غير كده أن مكنش في اضطرابات موثقة حصلت بين تحتمس الثالث وعمته حتشبسوت بالعكس دول ظهوروا في كذا صورة أنهم كانوا متعاونين واكبر دليل على كده أن حتشبسوت خلت تحتمس الثالث قائد الجيش بمجرد ما وصل لسن الرشد ، وكان يقدر تحتمس يعمل انقلاب على حتشبسوت وياخد الحكم بما أنه قائد الجيش وولي العهد لكن محصلش كده وفضلت حتشبسوت تحكم مصر لسنين وكان تحتمس قائد جيشها.

قال وليد :

- طيب هل لاقوا حاجة غريبة في المقبرة دي ؟

قالت غادة :

- للأسف المقبرة كانت فاضية .. مفيش فيها غير شوية النقوش الي على الحيطان وشوية فخاريات كانت فاضية.

قال وليد بعد أن شعر أنه لم يتوصل الي خيط واحد يستطيع أن يسير خلفه :

- تمام يا دكتورة .. الف شكر لحضرتك .. اسف لو ازعجناكي.

قالت غادة :

- مفيش ازعاج ولا حاجة .. بس انا مضطرة امشي دلوقتي .

ثم نظرت إلي عبير وقالت :

- انا هبعثلك على التليفون مقال عن الخلفية التاريخية للمقبرة وصاحبها وكل حاجة تحتاجيها في كتابة المقال الصحفي بتاعك.

شكرتها عبير وبعدها انصرفت غادة فوقف وليد والتف حوله ايمن وهناء التي



قالت :

- احنا مستفدناش حاجة .. كل الي عرفناه هو صاحب المقبرة وبس.

قال وليد :

- مش عارف يا هناء .. تفتكري نعمل ايه ؟

قالت هناء :

- ايه رايك نروح عند المقبرة دي ونشوف كده يمكن نلاقي اي حاجة أو خيط نمشي وراه .

نظر وليد الي ايمن الذي كان ينظر إلي عبير التي كانت جالسة تكتب على الأوراق في هدوء فقال له وليد :

- وانت ايه رايك يا ايمن ؟

قال أيمن :

- الرأي بتاعي أن البت عبير دي عماله تحلو كل يوم.

فضربه وليد بكتفه وهو يسير بجواره منزعجا وقال :

- يا عم ارحمني بقى .. ارحمني بقى.

\*\*\*

في المساء كان وليد وأيمن وهناء يسIRON بهدوء في الموقع الذي تم اكتشاف فيه مقبرة تجانيني ثم ساروا الي المكان الذي تم اكتشاف فيه الجثة المقطعة الي أشلاء ، فقال ايمن وهو يشغل مصباح هاتفه :

- ادينا وصلنا للمكان الي لاقوا فيه الجثة .. ايه المطلوب مننا بالضبط؟

قال وليد متاففا :



- طفي الكشاف ده الاول .. انا دافع للعساكر الي بره دي خمستلاف جنيه علشان بس ندخل لمدة خمس دقائق ولو اتعكشنا اهاalina مش هيشفونا تاني فأبوس ايدك يا ايمن ركز معانا ... دور على أي حاجة غريبة، فهمت؟

هزايمن رأسه في فهم ثم انقسموا الثلاثة كل واحد منهم في طريق واخذ كل شخص منهم يبحث عن أي دليل أو خيط يساعد في حل لغز تلك القضية أو على الأقل ليستطيعوا معرفة من هو صاحب الجثة .

وأثناء البحث وعلى بعد عدة أمتار من مكان المقبرة خلف تلة رملية صغيرة لاحظت هناء وجود بقعة على الأرض من الرماد وهناك اثار ورقة محترقة لكن متبقي منها ورقة صفراء اللون في حجم اصبع اليد منقوش عليها أربعة حروف غريبة الشكل ، فأخذتها على الفور وتوجهت الي وليد وأيمن الذين كانا يتناقشان في أمر ما ، فاعطت الورقة الصغيرة الي وليد الذي أخذ يتفحصها ثم قال :

- واياه علاقة الورقة دي بالي احنا جايين ندور عليه؟

قالت هناء :

- الورقة دي لسا محروقة قريب يا وليد والدليل على كده البقعة بتاعتها لسا موجودة وكمان الورقة موجودة وسط الرماد ولو دي محروقة من فترة كانت الورقة على الأقل طارت ومفضلتش موجودة مكانها.

قال أيمن وهو ينظر إلي الحروف الموجودة على الورقة :

- بس اياه الي مكتوب ده وبأي لغة ؟

قال وليد :

- ده الي هنعرفه من الدكتور غادة .



قال أيمن :

- طيب مش كنا جنبنا عبير معانا ؟

قال وليد :

- ليه ؟ ... قصدك يعني علشان التقرير بتاعها وكده بخصوص المقبرة دي

قال أيمن بأسلوبه المستفز :

- لأ ، كانت تطري علينا القعدة بدل ما هي ناشفة كده.

\*\*\*

في صباح اليوم التالي دخل ايمن إلى مكتب المحررين فوجد عبير جالسة على مكتبها تخط بعض الكلمات التي تقرأها من هاتفها الى الاوراق ثم نظر الى وليد الذي كان جالسا على مكتبه يتحدث عبر الهاتف المحمول وبجواره جلست هناء التي أشارت له بيديها أن يصمت الان الى أن ينتهي وليد من هاتفه وبعد قليل أنهى وليد محادثته فسأله أيمن :

- ايه الاخبار ؟

قال وليد :

- احنا بعتنا صورة للورقة الي لاقيناها امبارح للدكتورة غادة في رسالة على المحمول بتاعها وسألتها لو كانت تعرف حاجة عن معنى الي مكتوب فيها .

قالت هناء :

- وقالتلك ايه في مكالمة دلوقتي ؟

قال وليد :



- قالتلي أن الي مكتوب في الورقة دي كلمة مش مفهومة والأغرب أنها مكتوبة بالخط القبطي.

قال أيمن :

- ايه المشكلة ؟

قالت هناء بعد أن فهمت المقصود من حديث وليد :

- المقصود أن الورقة دي مكتوبة بالخط القبطي وفي زمن تحتمس الثالث مكنش في

خط قبطي كان في هيروغليفي

قال أيمن مرة أخرى :

- أيوة يعني فين المشكلة ؟

قال وليد بشئ من العصبية :

- يابني افهم وقت تحتمس التالت الكتابة كانت بالخط الهيروغليفي ، لكن الورقة

الي لاقينها مكتوبة بالخط القبطي ، في فرق زمني حوالي ألف سنة .. فالسؤال هنا

بقى ايه الي هي جيب ورقة مكتوبة بالخط القبطي قريبة من مقبرة كانت في زمن

الكتابة فيه بالخط الهيروغليفي ؟

قال أيمن بتساؤل :

- اه صحيح ايه الي يجيب ده جمب ده ؟

قالت هناء بسخرية وهي تنظر الي ايمن :

- صباح الفل

ثم أخذت حقيبتها وخرجت من المكتب مغادرة ، فجلس ايمن بجوار وليد وهو ينظر

إلي عبير المتأنقة في ملابسها وشعرها الأسود المنسدل ثم قال هامسا الي وليد :





- مش عيب الجمال ده كله ومفيش راجل واحد قدر يمتلكه؟

قال وليد همسا وبشئ من العصبية :

- ايوووا .. كويس انك فتحت الموضوع .. انت مالك ومال البت دي ، البنت دي في حالها يا ايمن مش زي الي تعرفهم .. شغالة معانا بقالها 3 شهور وانت بتاكلها بعينك انت والمدير الكلب بتاعنا ده .. ارحموا البت شوية

قال أيمن في اندهاش :

- ايه ده ؟ هو برضه استاذ يحي مبينز لش عينه من عليها ؟

ثم نظر إلي عبير مرة أخرى وقال همسا :

- وانا الي كنت فاكره اتعطل ومكنته صدت ، بس بصراحة البت تزييت اي مكنه عطلانه.

قال وليد بعد أن وكزه في ذراعه :

- احترم نفسك بقى شوية

ثم حاول وليد تغيير الحديث فقال :

- قولي كنت بتعمل ايه ؟

نظر ايمن الي وليد باندهاش كأنه تذكر شيئاً هاماً فقال :

- اه صحيح .. نسيت اقولك على حاجة .. فاكر المثلة الي اسمها ناني عاطف الي المفروض اعمل معاها لقاء .

قال وليد :

- أيوة فاكرها بتاعت الفيلم الي سقط ... مالها ؟

قال أيمن :



- النهاردة لما روحتلها حصلت حاجة غريبة .. لاقيتها لابسة اسود وبتعتذر ليا أنها مش هتقدر تعمل معايا اللقاء لتاني مرة علشان رايحه عز المهندس ماجد فريد .  
قال وليد متسائلا :

- المهندس ماجد فريد ؟ مش ده رجل الأعمال الشهير الي يعتبر أغنى واحد في البلد ؟

قال أيمن :

- مضبوط .. الغريب اني مكنتش اعرف .. ولما قولتها اني معرفش بالخبر ده استغربت وسالتني ازاي ده ابنه نزل بوست على الفيسبوك بيقول إن والده مات امبارح الفجر ، ولما حلفتها اني معرفش حاجة عن الخبر ده فتحت الفيسبوك علشان توريني الخبر .

قال وليد وقد بدأ يشعر بأمر ما :

- والخبر كان مكتوب فيه ايه ؟

قال أيمن باندھاش :

- ملقيناش الخبر .. لاقينا بس أن ابنه منزل بوست تاني بيقول فيه أن صفحته اتهكرت والخبر غير صحيح وان والده كويس بس بيعمل فحوصات طبية في بلد اجنبية وأنه بصحة كويسة .

قال وليد وهو يكتم غيظه ويكز على أسنانه :

- ياخي حرام عليك .. حرام عليك .. خبر زي ده لسا فاكر تقوله دلوقتي وعمال

تكلمني على الي مكنته صدت ومصدقش .. ياخي ارحمني

قال أيمن باندھاش :



- ليه بس يا وليد ؟ هو في ايه ؟

قال وليد :

- انت عارف معنى الكلام الي قولته دلوقتي هو ايه ؟

ثم نظر حوله ثم الي عبير ليتأكد أن لا أحد يستمع إلي حديثهما وقال هامسا :

- معناه أن الجثة الي لاقوها امبارح الصبح قريبة من المقبرة الفرعونية هي جثة  
ماجد فريد يا بني آدم.

\*\*\*



-3-

في قصر فخم على أطراف مدينة القاهرة كان اشرف مراد وزير الاقتصاد واقفا في بهو القصر وبالرغم من هيئته ووقاره إلا أن وجهه كانت تكسوه ملامح التوتر والقلق ، بعد قليل هبطت امرأتان من السلم المؤدي الي الدور الثاني تختلف جنسياتهما فقد كانت الأولى بيضاء الوجه زرقاء العينين شقراء الشعر تبدو عليها ملامح أوروبية وكانت ترتدي فستانا ابيض ضيق يبرز ثديها منه ويكاد أن ينبثق منه مفتوحا من الاسفل يظهر قدمها الناعمة كاملة الي أسفل مؤخرتها ، أما الأخرى فقد كانت ذات ملامح آسيوية جميلة بهذا الشعر الاسود الناعم والعينين الضيقتين والتي تتشابه مع عيون الصينيون واليابانيون ولا تختلف في ملابسها عن نظيرتها الأوروبية. كانتا تهبطان السلالم بخطى واثقة وما أن رأهما اشرف مراد حتى انحنى لهما في احترام وقال :

- التحية والاحلال لذوات الجمال .

قالت ذات الملامح الأوروبية بلغة مصرية بليغة :

- خير يا أشرف .. جيت ليه؟ وطلبت ليه مقابلتنا ؟

قال أشرف :

- اكيد زي ما انتوا عارفين أن في تغيير حكومي حصل وانا انعزلت عن منصبي بأمر سيادي ، فكده أصبحت مقدرش أفيدكم في حاجة أو أفيد ستنا في حاجة .

قالت ذات الملامح الآسيوية :

- وايه المطلوب مننا يا اشرف ؟



قال أشرف :

- انا دوري انتهى .. ومش هقدر اساعدكم في حاجة زي ما قلت في كلامي.

قالت ذات الملامح الأوروبية:

- احنا الي نقول دورك ينتهي امتي يا اشرف مش انت.

ثم استكملت ذات الملامح الآسيوية الحديث وقالت :

- المطلوب منك أن الوزير الجديد يكون مكانك ويكمل الي انت ابتديته ساعتها

يكون دورك انتهى معانا .

قال أشرف :

- طيب انا هحتاج مساعدة .

قالت ذات الملامح الأوروبية:

- هنبعت معاك واحدة شاطرة هتقدر تنفذ المطلوب منها.

ثم صفقت بيديها فخرجت من إحدى الغرف الموجودة ببهو القصر امرأة جميلة اقترب

عمرها من الثلاثون ووقفت أمام اشرف وقالت :

- اهلا يا اشرف باشا .. انا اسمي لمياء

رحب بها اشرف ووقف امام المرأتين ذوات الملامح الأوروبية والآسيوية، ثم قالت

المرأة ذات الملامح الأوروبية الي الشابة :

- والان اقسمي .

ركعت الشابة على الأرض ورفعت يدها اليسرى وقالت :

- اقسم بروح ستنا المبجلة بالطاعة العمياء وان انفذ كل ما هو مستطاع حتى تنتهي

مهمتي بنجاح.



ثم وقفت لمياء مرة أخرى بجوار اشرف في هدوء ، فقالت ذات الملامح الأوروبية:

- حاول تنجز مهمتك بسرعة يا اشرف وستنا مش هتنسى مكافاتك لكن اهم شئ أنك متتكلمش الا انت عارف ايه الي ممكن يحصل

كاد اشرف أن يقول شئ لكن لم تعطيه المراتان وقت لهذا وطلبتا منه الرحيل على الفور ، فخرج اشرف من القصر ومعه لمياء ، بعدها صعدت المراتان مرة أخرى وعند باب غرفة ما بالقصر طرقت ذات الملامح الأوروبية على الباب عدة طرقات خفيفة ثم فتحته لتدخلا المرأتين الي غرفة واسعة مظلمة لا نور فيها سوى انوار الشموع المتراصة حول جدران الغرفة وإمامهم كانت هناك امرأة واقفة تعطيهم ظهرها لا تظهر ملامحها ترتدى فستان ابيض واسع وعلى رأسها قطعة قماش بيضاء طويلة ، فقالت ذات الملامح الأوروبية:

- اشرف مراد تم عزله من منصبه ولمياء راحت معاه علشان يقدر يوقع بيها الوزير الجديد يا ستنا

هزت المرأة رأسها في فهم وهي تفعل شئ ما على المنضدة الحجرية الكبيرة الموجودة أمامها ، فاستكملت ذات الملامح الآسيوية الحديث وقالت :

- لمياء شاطرة وفاهمة هي هتعمل ايه بالضبط وواثقين فيها ..

لم تفتح المرأة فمها بل ظلت صامته الي أن أنهت ما تفعله أمام المنضدة ثم رجعت بظهرها إلي الورااء واسقطت قطعة القماش البيضاء التي على رأسها على الأرض ليظهر شعرها الابيض الكثيف ثم خلعت ملابسها ليظهر جسدها العاري المترهل ثم نامت على الأرض وهي تغطي وجهها بشعرها الابيض الكثيف ، هنا بدأت المراتان بالدندنه وكأنهم سيبدأون بالغناء وبعد قليل قالت المرأة ذات الملامح الأوروبية:



- يا سيد النار .. يا ملك الظلام .. خذ امرأتك وحببتك أشتي منها ما تشاء  
واعدها إلينا اقوى كما تشاء

ثم استكملت ذات الملامح الآسيوية وقالت :

- يا سيد النار .. يا ملك الظلام .. خذ هذا الجسد وضع فيه قوتك ، واعده إلينا اجمل  
كيفما تشاء فهي لك وانت سيدها  
ثم بدأت الاثنتان تقولان سويا :

- بعهد ميسالينا الدائم .. وقوة لاماتشو ابنتك .. خذ ستنا واعدها إلينا كما تشاء  
وفجأة بدأت الأرض في الاهتزاز ، وبدأت المرأتان تكرران جملتهما بصوت اقوى ،  
والمرأة نائمة على الأرض بهدوء .. والأرض تهتز بقوة أكبر .. وتهتزي أن خرجت نيران  
مذهلة من المنضدة الحجرية ، والمرأتان تكرران الجملة بقوة أكبر ، وفجأة خرجت  
يد كبيرة ضخمة حمراء اللون فأمسكت بجسد المرأة النائمة على الأرض وسحبته  
داخل النيران .. وبعدها انطفأت النيران فجأة كأنها لم تكن هناك .

هنا سقطتا المرأتين على الأرض ساجدتان وهما تهمسان بكلمات غير مسموعة  
وبعد دقائق قليلة أشتعلت النيران مرة أخرى ، وخرجت المرأة من النيران بجسدها  
العاري والذي أصبح ممشوقا وناعما وشعرها الذي تحول الى الأسود بعد أن كان ابيض  
يغطي وجهها .. وبعد ثوان ترنحت المرأة قليلا ثم سقطت على الأرض مغشيا عليها .

\*\*\*

حسب الخطة الموضوعية وصلت لمياء إلى مكتب وزير الاقتصاد الجديد وبعد أن  
قابلته قالت :

- انا لمياء الطرابلسي صاحبة شركة سياحية كبيرة وكان لنا شغل كثير جدا مع



وزارة الاقتصاد بحكم الأجانب والسياحة والعملية الصعبة الي بيدخلوا بيها مصر  
لزيارتها وده طبعا كان بيتم بالتنسيق معاكم ومع وزارة السياحة .

ابتسم لها الوزير حسن المهدي وقال :

- أيوة مضبوط .. سيادة الوزير السابق اشرف مراد شرحلي وضع شركتكم وقد ايه هي  
شركة وطنية مهمة بمجال السياحة وأعتقد أن بعد ما راجعت على الأوراق والشغل  
الي عملتوه مع بعض والنجاح الباهر الي حصل فأعتقد أن مفيش مشكلة نفضل  
ماشيين على نفس النظام .

ابتسمت لمياء في فرح ثم قالت :

- تمام اوي يا سيادة الوزير .. كده بقى حضرتك لازم تحضر الحفلة الي انا عملاها في  
فيلتي احتفالا بتولي منصب حضرتك وكمان عيد ميلادي.

قال الوزير حسن مازحا :

- للأسف انا ماليش في جو الاحتفالات ده ، وبعدين الواحد مننا كبر خلاص  
مبقاش قد السهر .

ضحكت لمياء في دلال وقالت :

- لأ لأ متقولش كده يا سيادة الوزير .. مدام حضرتك تزعل كده  
فابتسم حسن وقال :

- المدام الله يرحمها من خمس سنين .

فقلت لمياء :

- الله يرحمها .. بس برضه هنتظر حضرتك تيجي الحفلة.

ثم أخرجت من حقيبتها كارت ورقي وأعطته إياه وقالت :





- الحفلة ستكون بكرة في فيلتي والعنوان موجود في الكارت بتاعي ، انا مصرة أن حضرتك تيجي.

قال حسن :

- هكون موجود الساعة تسعة.

\*\*\*

في مساء اليوم التالي كان الوزير حسن المهدي واقفا بأناقته المعهودة أمام فيلا لمياء التي فتحت له وهي ترتدي فستان اسود مثير ورحبت بها ودعته للدخول ، وما أن دخل حسن المهدي الي الفيلا حتى وجدها فارغة تماما من الزوار والضيوف فسألها مندهشا :

- هو انا جيت بدري ولا حاجة يا مدام لمياء ؟

قالت لمياء وهي منزعة :

- شوفت المقلب الي شربته .. كل صحابي والناس الي عزمتهم يا اما مسافرين يا اما عندهم اسباب متخليش حد فيهم يقدر ييجي .. كله اعتذر النهاردة .  
فوضع حسن يده في جيب بذلته وأخرج علبة صغيرة وقال وهو يبتسم مقدما لها العلبة مهنئا :

- طيب كل سنة و حضرتك طيبة ، وانا هضطر امشي بقي .

لكن فجأة أمسكت لمياء بيده وقالت بدلال :

- هتمشي كده على طول .. انت عايزني ازعل منك .

ابتسم حسن وقال :

- لا ياستي ولا زعل ولا حاجة ، بس مايصحش نبقي موجودين لوحدنا في فيلا



كبيرة زي دي .

ضحكت لمياء وهي تسكب بعض العصير في كأس زجاجي وقالت وهي تعطيه إياه :  
 - أعتقد أن احنا بالغين كفاية يا حسن بيه ، وعارفين تصرفاتنا وواثقين في نفسنا .  
 فابتسم حسن في خجل وتوتر ثم شرب رشفة صغيرة وقال وهو ينظر في أرجاء  
 الفيلا :

- امال فين جوزك يا مدام لمياء ؟

قالت لمياء بعفوية :

- انا مش متجوزة

قال حسن في تساؤل :

- مطلقة ؟

ضحكت لمياء وقالت :

- ومش مطلقة ولا أرملة كمان .

ابتسم حسن وقال متسائلا :

- غريبة ؟ امال لقب مدام ده على أساس ايه ؟

اقتربت منه لمياء الي أن لمس جسدها جسده وقالت بدلال :

- على اساس اني بهدي نفسي وجسمي لي يستحقه يا حسن .

احمر وجه حسن وكاد الدم يخرج من بؤبؤ عينيه وهو ينظر إلي ثدي لمياء البارز من

الفيستان وقال وهو يحاول تمالك نفسه :

- اعتقد اني لازم امشي دلوقتي .

قالت لمياء :



- تمشي قبل ما اوريك المفاجأة بتاعتي؟

قال حسن :

- مفاجأة ؟ مفاجأة ايه ؟

طلبت منه لمياء أن يجلس وينتظرها لعدة ثوان لتحضر له شئ من غرفة نومها ، وبعد أن صعدت الي غرفتها أخذ حسن يتجول في بهو الفيلا يشاهد الصور والرسومات المعلقة على الحائط وكم من مرة أراد فيها مغادرة الفيلا لكن كان هناك شئ بداخله يطلب منه الانتظار الي أن تأتي لمياء ومعها المفاجأة التي أخبرتها عنه ، وبعد قليل ظهرت لمياء أمامه وقد ارتدت روب من الحرير اسود اللون وقد عقصت شعرها الي الخلف ، فنظر لها حسن مستغربا وقال :

- فين المفاجأة ؟

أمسكت لمياء بيده وسارت به الي أن دخلت معه الي غرفة مظلمة وبعد أن أغلقت الباب واناتر ضوء الغرفة وجد حسن نفسه في غرفة النوم الخاصة بها.

\*\*\*

في الصباح الباكر استيقظ حسن المهدي فوجد نفسه نائما على الأرض عاري الجسد وما أن التفت حوله حتى وجد امرأتان جالستان أمامه على كرسيين من الجلد إحداهما ذات ملامح أوروبية والأخرى آسيوية فانتفض حسن من مكانه وأخذ يبحث بين أرجاء الغرفة عن ملابسه لكنه لم يجدها فسألها عن ماهيتهما وماذا يريدان منه ، فقالت المرأة ذات الملامح الأوروبية:

- اسمع يا سيادة الوزير كل الي حصل امبارح مايينك وبين لمياء اتصور

قال حسن صارخا :



- اتصور ايه ؟ انتم مين وعازين مني ايه ؟ وفين لمياء ؟

وقفت ذات الملامح الآسيوية وسارت بهدوء الي أن وقفت امام حسن وقالت :

- لمياء روح بيتها علشان مهمتها خلصت ، احنا مين ؟ مش شغلك ، عازين

منك ايه ؟ ده المهم .. وكل الي مطلوب منك هنقولك في الوقت المناسب.

قال حسن :

- بقولكم ايه انتم مش عارفين انا مين ؟

هنا لطمت ذات الملامح الآسيوية حسن على خده بقوة جعلته يسقط على الارض من

قوة اللطمة وقالت وهي تكز على أسنانها:

- انت من هنا ورايح هتكون عبد هتنفذ كل الي تؤمر بيه ستنا.

قال حسن وهو يتاوه من اللطمة:

- ستكم مين ؟ ده انا هسجنكم .. ده انا هطلع ميتين ابوكم

قالت ذات الملامح الأوروبية :

- طلع براحتك .. واحنا كمان هنطلع كل الي اتصور مايينك وماين لمياء ، تخيل كده

معايا لما تظهر صورك في أوضاع مخلة على مواقع وجرايد.

أكملت ذات الملامح الآسيوية الحديث وقالت :

- هتبقي فضيحة دولية وهتفضل السوشيال ميديا تلعنك انت وامثالك لعشر سنين

قودام ده غير موقف الحكومة والمحكمة الي هتتنصبلك ومتنساش كمان اولادك

الي هيطلعهم من الفضيحة والحظ جانب.

جلس حسن في زاوية الغرفة بعد أن وجد نفسه مثل الفأر الذي وقع في فخ القط

ولا سبيل له إلا الاستسلام التام ثم قال :



- ولو نفذت كل الي مطلوب مني ؟

قالت ذات الملامح الأوروبية وهي تقترب منه :

- ستنا هتبقى راضيه عنك .. وهتلاقي جنس ومتعة وفلوس وسطوة ونفوذ.. وكل الي بتحلم بيه.

قال حسن وهو ينظر إليهم في ندم وشفقه على حاله:

- موافق.

\*\*\*

في مكتب المحررين بجريدة الوسام دخل ايمن الي المكتب حاملا حقيبته الجلدية على كتفه فوجد عبير جالسة تكتب بعض الاشياء على الأوراق فقال لها ايمن :

- صباح الخير يا عبير

فنظرت له عبير مبتسمة وقالت في أدب :

- صباح الخير يا استاذ ايمن .

وضع ايمن حقيبته على مكتبه وسار الي أن وقف أمام مكتب عبير وقال :

- جرى ايه بقى ، انا بقولك يا عبير قوليلي يا ايمن مفيش داعي لاستاذ دي.

قالت عبير في خجل :

- حاضر يا استاذ ايمن .

قال أيمن مندهشا :

- ثاني ؟

ضحكت عبير وقالت :

- حاضر يا ايمن



ابتسم ايمن فرحا وقال :

- قوليلي انتي بقالك 3 شهور في الجورنال معانا ومفيش ولا مرة خرجتي فيها معانا .  
قالت عبير في خجل :

- ما هو محدش عازمني قبل كده ولا حد قالي !

قال أيمن بعد أن فكر مليا :

- تصدقي عندك حق .. احنا الي عندنا قلة زوق .. خلاص اي خروجة بعد كده انتي معانا ، موافقة ؟

هزت عبير رأسها موافقة في خجل فابتسم ايمن وكاد أن يقول شئ لكن دخل وليد فجأة إلى المكتب فوجد ايمن واقفا امام مكتب عبير فنظر لها وألقى عليها تحية الصباح في احترام ثم سحب ايمن من يده الي أن جلس على مكتبه وقال :  
- يابني انت مش هترحم البت دي بقى ، يا بني سبها دي واحدة في حالها.  
قال أيمن :

- والله ما ضايقتها ده انا كنت بعزمها لو في خروجة هنخرجها ولا حاجة أنها تيجي معانا .. وبصراحة البنت كانت لطيفة ووافقت.

قال وليد وهو يخرج أوراقا من مكتبه :

- والله كتر خيرها أنها توافق على عزومة ولا خروجه من واحد زيك.  
قال أيمن :

- ياعم هو في ايه ؟ روح بص لنفسك واحد زيك وفي وسامتك ماشي مع قصبة  
مخصوصة اسمها هناء.

قال وليد معاتبا :



- حاسب على كلامك يا ايمن .. هناء دي عشرة سنين ومسمحش لاي حد أنه يجيب سيرتها.

قال أيمن متسائلا :

- طيب بزمتك ودينك انت بتحب هناء ؟

نظر وليد له مفكرا ثم قال :

- تصدق لو قولتلك مش عارف ، لكن كل مشاعري نحيثها هي مشاعر حلوة

ولطيفة دائما الاتصالات بينا مبتتقطعش ولو عدت ساعة محدش فينا كلم الثاني

بحس أن في حاجة كده نقصاني واليوم الي مبشوفهاش فيه بحس أنه مش يوم حلواو

أنه يوم مش محسوب من عمري.

قال أيمن مهللا :

- يا سلاااام يا سيدي ... هو ده الحب ياض .. انت بتحبها يا وليد.

قال وليد :

- يمكن .. مش عارف .. سيب الكلام ده لوقته وقولي هي جت ولا لسا ؟

سأله ايمن وقال :

- مين ؟ هناء ؟

قال وليد :

- يابني آدم هواحنا بنتكلم على حد غيرها ؟

قال أيمن :

- ايوة .. كنا بنتكلم على عبير برضه.

قال وليد متاففا :



- ياعم ابوس ايدك ريحني ، هناء جت ولا لسا ؟

قال أيمن نافيا :

- مشوفتهاش.

قال وليد :

- طيب انا عاوز اخذ من عندك بدلة شياكة كده من البدل الي بتحضر بيها

مهرجانات الفنانين دي ، علشان عندي مشوار مهم بالليل انا وهناء.

قال أيمن :

- مفيش مشكلة .. تعال البيت خد الي انت عاوزه .. بس قولي ينفع اجي معاكم ؟

قال وليد :

- للأسف المشوار ده مهم جدا وحساس ومش عايزين يحصل فيه اي غلطة ..

وعلشان كده مش هنقدر ناخذك معانا لأن لسانك بسم الله ماشاء الله يعني.

قال أيمن :

- طب قولي المشوار ده بخصوص القضية إياها ؟

هز وليد رأسه دلالة على نعم فقال له أيمن مرة أخرى :

- طيب ناخذ عبير معانا ؟

فنظر له وليد متسائلا في اندهاش ولم يجد كلمات يقولها بعد أن شرح له وأخبره أنه

لا يريد معه خاصة لحساسية الموقف، فأصر وليد على الصمت ولم ينطق بكلمة

واحدة ، فقال أيمن في محاولة لإقناع وليد :

- انا بقول كده علشان تطري القعدة علينا بدل ما هي ناشفة.

\*\*\*





في المساء كانت هناء جالسة في السيارة التي اقترضتها من ابنة عمها وبجوارها وليد منتظرين احدهم أسفل عمارة ما في منطقة شهيرة ثم نظر إلى هناء وقال :

- انتي متأكدة أن هشام ابن ماجد فريد بييجي هنا ؟

قالت هناء :

- أيوة هو عنده مكتب استشارات هندسية هنا وده الميعاد الي بييجي فيه شوية وهتلاقيه جاي.

بعد قليل وصل هشام الشاب بسيارته الفارهة ثم هبط منها وهو يمسك حقيبته الجلدية وتوجه الي مدخل العمارة ، فخرج وليد وهناء فورا من السيارة وسارا وراء هشام وهما ينظران حولهما ليتأكدان بأن لا احد يراقبهما أو يراقب هشام ، وما أن ركب هشام المصعد حتى لحق به وليد وهناء ثم دخلا معه وفي المصعد تنحنح وليد وقال :

- مساء الخير يا استاذ هشام .

نظر له هشام متسائلا وقال :

- حضرتك تعرفني ؟

قالت هناء :

- طبعا يا شمههندس .. حضرتك المهندس هشام فريد ابن رجل الأعمال الشهير

ماجد فريد ، انا هناء سلام وده الاستاذ وليد السمنودي محررين في جريدة الوسام.



قال هشام في ضيق :

- انا وضحت كل شئ ونزلت بوست على الفيسبوك وشرحت فيه أنه خطأ غير مقصود .. ووالدي بصحة كويسة و..

قال وليد مقاطعا :

- بشمهندس هشام .. احنا عارفين أن والدك اتوفى ومتأكدين من كده وعارفين انك بتقول كده لأسباب أمنية ، احنا بس كنا بنستأذن حضرتك بمناقشة صغيرة نقدر بيها نمسك خيط ولو صغير يساعدنا في حل اللغز ده.

قال هشام والضيق على وجهه :

- يا استاذ انا قولتلك أن والدي بصحة كويسة.

ثم اوقف المصعد في إحدى ادوار العمارة وأمرهم بالخروج وهو يقول:

- انتوا لو ممشتوش انا هطلب لكم البوليس .

ثم اغلق المصعد وتركهم ، وقفت هناء وهي تنظر الي وليد في يأس ، فهبط وليد على السلام وخلفه هناء ، وعندما وصلا إلى سيارتهما وركباها ركبت في السيارة على الكرسي الخلفي لها امرأة تخفي ملامحها بأيشارب اسود فجأة ثم قالت لهم بلهجة متوترة:

- بسرعة بسرعة .. يالا اتحركوا.

نظر لها وليد في فزع وقال :

- انتي مين ؟

قالت المرأة :



- مش انتم عاوزين تعرفوا مين الي قتل ماجد فريد ؟ أنا عارفة مين

\*\*\*

في غرفة خالية مظلمة بالقصر كانت ذات الملامح الآسيوية ممسكة بشمعة حمراء اللون ينير ضياء نارها الغرفة تحملها بيدها اليمين وفي يدها الأخرى تحمل اناء فخاري ، كانت تسير بخطوات هادئة وواثقة الي أن وقفت خلف امرأة عارية لا يظهر نار الشمعة شئ من جسدها سوى شعرها الأسود الطويل ، ثم رفعت الإناء الفخاري الي الاعلى لتسكب محتواه على رأس المرأة الواقفة أمامها وهي تهمهم ببعض الكلمات الغير مفهومة ، فانسال السائل الاحمر الدموي الغليظ على رأس المرأة واتساب قطراته على شعرها وجسدها ، بعد لحظات بدأ جسد المرأة يرتعش قليلا وبدأ السائل الدموي يذوب وسط مسام بشرتها وكان جسد المرأة يمتص هذا السائل ويتغذى عليه ، بعد قليل جاءت ذات الملامح الأوروبية وسكبت من اناء فخاري آخر سائل ابيض اللون على رأس المرأة وجسدها وهي تهمهم ببعض الكلمات أيضا الغير مفهومة، وبعدها ارتدت المرأة فستانا ابيض واسعا من الصوف ثم وضعت قطعة قماش بيضاء اللون من الحرير على رأسها لتغطي ملامح وجهها أيضا .. فقالت ذات الملامح الأوروبية:

- الحفلة بدأت يا ستنا .. وكل رجالتنا حضرت

هزت المرأة رأسها في فهم ثم استدارت وتوجهت الي باب الغرفة للخروج ، وفي بهو القصر كان هناك الكثير من الرجال الذين يرتدون أقنعة بيضاء مصممة تماما لا تظهر منها غير عيونهم وانوفهم وافواههم وكانت تسير بينهم شبابت جميلات يرتدين تلك الملابس الجلدية الضيقة من رقباتهم الي أسفل أقدامهم يقدمن للرجال



مشروبات في كؤوس فاخرة ، وما هي إلا لحظات حتى اطفأت انوار القصر ثم سارت الشابات واضاءت تلك الشموع الغليظة سوداء اللون المتراسة بجوار جدران بهو القصر وبعدها وقف الرجال متراصون في صفوف بجوار بعضهم البعض وما هي إلا لحظات حتى هبطت المراتان ذات الملامح الأوروبية والآسيوية وبينهما كانت ستنا تهبط بهدوء بفستانها الابيض وقطعة القماش الحريرية البيضاء التي على وجهها ورأسها لتغطي ملامح وجهها ، وما أن راوها الرجال حتى قالوا في صوت واحد وهم ينحنون إليها في وقار :

- التحية والاحلال لستنا العظيمة.

رفعت (ستنا) يدها ليقف الرجال وهم ينظرون لها في أدب ، فقالت ذات الملامح الأوروبية:

- الليلة دي احنا متجمعين علشان نحتفل بانضمام عضو جديد لجماعتنا.

خرج حسن المهدي من إحدى ابواب الغرف الموجودة في بهو القصر ثم سار الي أن وصل ووقف أمام (ستنا) ثم ركع على ركبتيه وقبل يدها وبعدها قال :

- التحية والاحلال لستنا العظيمة.

ثم وقف على قدميه مطأطأ الرأس أمامها فامتدت يد (ستنا) الي يد ذات الملامح

الآسيوية لتأخذ منها قناع ابيض لا يختلف عما يرتديه باقي الرجال الواقفون و

وضعته على وجه حسن بهدوء ليرتديه وبعدها انحنى لها حسن في احترام ، ثم

هبط في هدوء ووقف بين الرجال المتراصين في صفوف، بعدها قالت ذات الملامح

الآسيوية:

- العهد الي ماينا هو عهد دايم ، عهد مستمر ، عهد ميتوقفش غير في حالتين ،



الحالة الأولى وهي الخيانة ودي جزاءها القتل والحالة الثانية أن يكون دورك خلص ، ولو دورك خلص هتفضل عايش في امان لكن لو فكرت تتكلم انت عارف هيحصل فيك ايه.

بعدها بدأت الشابات يسرون بين الرجال يعطونهم وريقات صغيرة وكأس من النحاس ممتلئ بسائل ما احمر اللون ، وما أن انتهت الشابات حتى قالت ذات الملامح الأوروبية:

- الورق الي معاكم ده هو المطلوب منكم خلال الفترة دي .. مفيش اسئلة مفيش استفسارات مفيش تخازل في تنفيذ الأوامر.

تقدمت إحدى الشابات وهي تحمل ثلاثة كؤوس من الذهب ممتلئين بنفس السائل الاحمر فأخذت المرأة ذات الملامح الأوروبية والأسيوية الكأسين أما (ستنا) التي كانت تتوسطهما فقد أخذت كأسها وسكبتة على رأسها لينساب السائل على القماشة الحريرية البيضاء التي تغطي رأسها ولامح وجهها ، وما أن فعلت (ستنا) ذلك حتى رفعت ذات الملامح الآسيوية يدها المسكة بالكأس الذهبي وهي تقول بصوت عالي :  
- عهد ميسالينا عايش بستنا

فكرر الرجال بصوت واحد وهم يرفعون أيديهم بكؤوسهم ثم أخذوا يجرعون شرابهم .

\*\*\*

- والسائل ده عبارة عن ايه ؟

قالها وليد الذي كان جالسا امام مقود السيارة وبجواره هناء إلى المرأة الجالسة في الكرسي الخلفي والتي تحاول أن تخفي ملامحها بأيشارب اسود ، فقالت المرأة بهمس :



- مش عارفة ، انا شوفت الي بيحصل ده مرة واحدة بس ، لكن بعد كده كنت بروح القصر علشان انصف وفس.

قالت هناء بأشمئزاز :

- ايه الطقوس الغريبة دي ؟ هو ده نوع من السحر الاسود ولا جماعة متطرفة ولا ايه بالضبط؟.

قالت المرأة :

- انا معرفش بالضبط ايه ده ؟

قال وليد وهو ينظر إلى المرأة :

- طيب قوليلي يا سعاد ، هل كان في نوع من أنواع القرابين ؟ كانوا يقتلوا حد مثلا ، أو بيقتلوا حيوان ؟

قالت سعاد :

- أيوة .. في مرة كنت داخله اودة انصفها في القصر ، كنت عارفة أن الاودة دي

ممنوع ادخلها في أيام محددة ، لكن في يوم دخلت الاودة وانا ناسية أن اليوم ده كان من ضمن الايام الي ممنوع ادخلها وشفت ستنا وهي بتدبح اربع قطط ، والحمد لله انها محستش بيا وخرجت منها من غير ما تحس بيا برضه.

قالت هناء وهي تنظر الي وليد :

- الموضوع ده كبير يا وليد

ثم نظرت إلى سعاد وقالت :

- طيب انتي ليه جاية دلوقتي تقولي كده ؟

قالت سعاد :



- بصي يا ست هانم .. الناس دي انا متأكدة أنهم هم الي قتلوا ماجد فريد.  
قال وليد :

- ايه علاقة ماجد فريد بالجماعة دي ؟  
قالت سعاد :

- لاتيأنا سألته قبل كده وقال مفيش ده مجرد بيزنس  
قالت هناء متسائلة :

- سألتيه ؟ ازاي واشمعني ؟  
قالت سعاد :

- انا كنت متجوزة ماجد فريد جواز عرفي ، انا عرفته لما كان بيروح يقابل ستنا  
وعجبته وطلب يتجوزني ، فاتجوزنا .  
قالت هناء :

- يعني انتي كنتي مراته في السر ؟ طيب ومكنش في اعتراض من الجماعة دي ولا  
من الي اسمها ستنا دي ؟  
قالت هناء :

- لأ ، محدش كان يعرف ، هم كانوا عارفين اني بروح علشان انصف شقته ومكتبه  
ووس .

قال وليد متسائلا :

- وانتي مش خايفه أن بالمعلومات الي قولتيها دي أنهم يقتلوكي ؟  
ابتسمت سعاد في حزن وقالت :

- ايه الي هيخوفني يا استاذ؟ ، انا كده كده ميتة ، انا مريضة سرطان وفي مرحلته



الأخيرة ومفيش علاج ، لو جم قتلوني هيكون موت اسرع واحسن من الالم والوجع الي عايشه فيه باستمرار .

ثم بدأت سعاد في البكاء فربتت هناء على كتفها بحزن ، وبعد لحظات قالت سعاد :  
- اسمع يا استاذ .. انتم لازم توصلوا للناس دي وتخلصوا عليهم دول مش بني ادمين .

قال وليد :

- طيب ليه يا سعاد مروحتيش بلغتي البوليس ؟

قالت سعاد :

- خفت اروح وينكشف السر والجماعة تلحق نفسها والبوليس ميقدرش يثبت عليهم حاجة ، تاني حاجة اني معرفش اسمائهم .

هز رأسه وليد في فهم ، ثم تذكر شيئاً وقال :

- طيب وانتى ازاي عرفتي أن احنا هنييجي النهاردة ؟

قالت سعاد :

- انا مكنتش مستنياكم انتم ، انا كنت مستنية البشمةهندس هشام لكن لما لاقيتكم داخلين وراه عرفت الأستاذة هناء ، كنت بشوف صورها على الجورنال الي كان بيقراه ماجد الله يرحمه ، فقولت لازم احكيلكم انتم لانكم هتصدقوني.  
هز وليد رأسه في فهم ثم نظر الي هناء وقال :

- احنا كده برضه موصلناش لحاجة ، كل الي عرفناه هي معلومات ، لكن في أسئلة كتير ملهاش أجوبة .

قالت هناء وهي تنظر إلي سعاد :





قالت هناء وهي تنظر إلى سعاد :

- قوليلي يا سعاد انتي تعرفي فين مكان القصر ده ؟

قالت سعاد :

- معرفش بصراحة يا استاذ ، هم كانوا بيعيجي ياخدوني من عند مدخل البلد ولما بركب العربية كانوا بيغطوا وشي بقماشة سودا لحد ما اوصل جوا القصر .

قال وليد :

- طيب تقدري تحديلنا الوقت الي بياخده المشوار من بداية ما بيعيجي ياخدوكي لحد ما يوصلوا بيكي للقصر .

قالت سعاد :

- حوالي خمسة أو عشر دقائق وبكون وصلت جوا القصر .

قال وليد وهو ينظر لهناء :

- من بكرة لازم ننزل ندور ونعرف فين مكان القصر ده .

قالت هناء :

- اكيد طبعا .

\*\*\*



-5-

بعد مرور أربعة أيام كان ايمن جالسا على مكتبة ممسكا بهاتفه يلعب إحدى الألعاب وبعد قليل دخلت هناء وخلفها وليد ويبدو على وجوههم التعب والارهاق فقال لهم ايمن بعد أن جلسوا على مكاتبهم :

- ها وصلتوا لحاجة ؟

هزت هناء رأسها بالنفي وقال وليد :

- بنلف بقالنا اربع ايام ، ومفيش اي وجود للقصر ده ، كل الي موجود هناك بيوت من 3 أو 4 ادوار بمساحات صغيرة أو فيلل وبرضه مساحتها صغيرة أو وسط مش كبيرة أو مثلا بتدل على أنها قصر فخم وكبير زي ما اتوصفلنا .  
قال أيمن :

- يمكن الست دي مبتعرفش توصف كويس لان هيكون فيلا زي قصر بالنسبالها .

قال وليد :

- دي قالت ريسبشن واسع وكبير وفيه كذا اوده كبيرة تانيه أبوابهم كلهم موجودة في الريسبشن ، ده يبقى اكيد قصر يا ايمن حسب الوصف بتاعها .  
قال أيمن :

- موضوع يحير بصراحة !! طيب مجربتش تاخدوا الست دي معاكم يبقى مثلا تكون في علامة أو حاجة مميزة تعرفها موجودة قريبة من المكان .  
قالت هناء :



- بتصل بيها بقالي يومين وتليفونها مقفول.

هرش ايمن في رأسه ثم قال في ذكاء :

- يبقى اتقتلت .

قال وليد :

- فال الله ولا فالك يا اخي .. انت ايه ؟ وبعدين انت سمعت أن في جريمة قتل

حصلت اليومين دول ؟

صمت ايمن قليلا فلاحظت هناء بأن عبير غير موجودة على مكتبها فسألت ايمن

عنها فأخبرها بأنها اتصلت اليوم بالمدير وطلبت منه أن يكون اليوم إجازة بسبب

مرض والدها ، فقالت هناء :

- يا حول الله يارب .. احنا كده لازم نروح نزورها النهاردة .

فقال ايمن فرحا :

- واجب برضه.

هنا رن هاتف وليد فأجاب ، ثم تبذلت ملامحه الى الجدية وهو يقول :

- تمام .. تمام

ثم أخرج ورقة وقلم وكتب وهو يقول :

- تمام .. هكون في انتظارك في العنوان ده .

ثم أغلق هاتفه وهو ينظر إلي ايمن و هناء وقال :

- ده واحد لسا قافل معايا وبيقولي أنه عاوز يقابلني النهاردة الساعة ثمانية علشان

عنده معلومات مهمة جدا بخصوص ماجد فريد.

قالت هناء محذرة :

- اوعى يكون فخ يا وليد .



قال وليد :

- معتقدتش كده .. الي كلمنى كان متوتر وكلامه مش مترتب ، كمان رقم التليفون بتاعه ظاهر باسم عبده البقال وده دليل على أن التليفون مش تليفونه وأنه بيامن نفسه علشان محدش يكون مراقب التليفون ويعرف شخصيته.

قال أيمن :

- يعني هنروحله النهاردة ؟!

قالت هناء :

- طبعا يا ايمن .. دي فرصة من ذهب متتفوتش.

قال أيمن متلهفا :

- طيب ومشوار عبير ؟ مش هنروحلها ؟

قال وليد :

- معلشي .. نأجلها لبكرة لو مجتش وفضل ابوها تعبان.

قال أيمن بنبرة خاسرة :

- بكرة ؟! .. وانا الي كنت عايزها تطري علينا القعدة الليلة بدل ماهي ناشفة كده.

\*\*\*

في المساء وقف وليد وهناء وأيمن في المكان المتفق عليه وقد اقتربت الساعة إلى الثامنة مساء وما هي إلا لحظات حتى جاءت سيارة سوداء وقفت أمامهم ونزل منها شخص ما ضخم البنية وقال متسائلا:

- استاذ وليد ؟

فهز وليد رأسه وهو يقول :

- أيوة انا وليد .



فأشار لهم الرجل الضخم الى السيارة وهو يقول :  
- اتفضلوا اركبو.

فركب الثلاثة في السيارة وركب الشخص الضخم وجلس خلف مقود السيارة  
وبعدها جاء رجل ضخم ثاني كان موجود في السيارة ووضع على اعينهم قطعة قماش  
سوداء لتحجب عنهم الرؤية وأمرهم الا ينتزعاها ثم انطلقت السيارة.  
بعد مرور ساعة وصلت السيارة الى مخزن قديم مهجور فنزل الرجل الضخم وأخذ  
وليد وهناء وأيمن وازاح القطع القماشية من على اعينهم ثم أشار لهم الى مجموعة  
من الكراسي وطلب منهم الجلوس ، بعد قليل جاءت سيارة أخرى ونزل منها حسن  
المهدي وبخطوات ثابتة سار الى أن وقف أمام وليد ثم مد يده إليه مصافحا وقال :  
- اهلا يا استاذ وليد.

فصافحه وليد في احترام ، ثم لاحظ حسن المهدي بوجود ايمن وهناء فسالهم عن  
ماهيتهم فأخبره وليد بأنهم أصدقاءه فنظر لهم حسن المهدي متفحصا ثم جلس  
أمامهم وقال :

- قولي يا استاذ وليد ، ايه الي حكتهولك سعاد ؟  
جلس وليد بعد أن جلسا كل من ايمن وهناء ثم قال :  
- سعاد مين يا فندم ؟ احنا منعرفش حد بالاسم ده.  
ابتسم حسن في ود وقال :

- متقلقش يا استاذ وليد ، سعاد في امان وفي الحفظ والصون ، انا عارف انكم  
حاولتم تتصلوا بيها بقالكم يومين علشان تعرفوا فين مكان القصر بالضبط او حتى  
تقولكم على علامة بدل ما انتوا عاملين تدوروا على ابره في كوم قش.



قالت هناء متسائلة:

- هي سعاد كويسة ؟

ابتسم حسن المهدي لها في ود وقال :

- سعاد كويسة يا استاذة هناء ، بس انا عاوز اعرف سعاد قالتلكم ايه بالضبط ،

علشان انا أقدر اساعدكم واكملكم الناقص الي مش عارفينه.

نظر له ايمن بتركيز شديد ثم قال :

- مش حضرتك برضه السيد حسن المهدي ؟ حضرتك وزير الخارجية ، مضبوط ؟

قال حسن :

- مضبوط

قال وليد متسائلا بدهشة :

- وايه علاقة حضرتك بالموضوع ده ؟ وازاي هتقدر تساعدنا ؟

قال حسن :

- خليني اقولك يا استاذ وليد وباختصار اني وقعت في فخهم بمنتهى السذاجة مني ،

لكن أنا راجل صعيدي ومحبش حد يضحك عليا واحب اخذ حقي ومسكتش عنه

ولا ابقى ضعيف أو ذليل لحد.

قال وليد :

- يبقى انت اكيد بقيت عضو في الجماعة إياها دي .

قال حسن :

- عضو بالغصب .. عضو لو فتح بوقه وبلغ البوليس ولا حتى اتكلم ساعتها مشواره

السياسي كله هيبقى في الأرض ومسيرتي المهنية كلها هتبقى صفرده غير تدمير حياة



ناس كتير مرتبطة بيا .

قالت هناء :

- مفهوم يا سيادة الوزير ، طيب احنا نقدر نساعد ازاي ؟

قال حسن :

- لما وقعت في الفخ ده وحصل الي حصل ، قررت اني لازم اخلص على الجماعة دي ، واخلص عليهم يعني اقتلهم وكان في استطاعتي اعمل كده لكن قولت أن مفيش سربيفضل مستخبي واكيد اسمي هيتجاب في الرجلين ، وساعتها هكون خسرت برضه ، علشان كده أجرت واحد يعمل كل التحريات المطلوبة .

قال أيمن :

- ما هو كده ياسيادة الوزير ممكن الراجل ده برضه يبتزك .

قال حسن بطريقة ودية:

- لأ .. المواضيع دي بتم على النت ، الدفع الاونلاين يا سيدي ، وكنت مهتم اعرف ايه اخبار البت دي الي عملتلي الفخ وكم ان ايه هي قصة الواد ابن ماجد فريد وخصوصا اني عرفت من مصادري أن فعلا ماجد فريد اتقتل لكن في تكتم شديد من الأجهزة الأمنية ، وخلصت التحريات ، وعرفت حاجات مهمة جدا ، لازم انتم كمان تعرفوها ، لكن قبل اي شئ ، لازم من هنا ورايح يبقى في تنسيق ما بينا .

قال وليد :

- حاضر يا فندم ..

قال حسن :

- من التحريات بتاعتي عرفت أن البنت الي وقعتني دي اسمها لمياء متولي



كانت بنت ريكلام من وهي عندها عشرين سنة شغاله في نايت كلوب درجة تاتية  
وبعد كده البنت دي اختفت لمدة عشر سنين والايام دي رجعت باسم لولو اشهر  
رقاصة في شارع الهرم كله .

قال وليد :

- طبعا العشر سنين الي اختفتهم دول كانت شغالة مع ستنا دي.

قال حسن :

- بالظبط كده ، البت دي تعرف كل صغيرة وكبيرة تخص الجماعة دي بسبب السنين  
الي عاشتها معاهم ... دوركم بقى هنا انكم توقعوها في الفخ وتخلوها فعلا تعترف  
بكل حاجة.

قال وليد :



- وليه حضرتك معملتش كده ؟

قال حسن :

- زي ما قولتلك يا استاذ وليد بسبب موقعي ومنصبي هكون بعرض نفسي لشبهات  
كثير ، لازم حد غيري واكون واثق فيه ويعمل المطلوب منه وعاوز يحل فعلا لغز  
القضية دي ، مش واحد انا مأجره علشان نخلص من حد ويقعد باقي عمره يبتزني.

قال وليد :

- كلام حضرتك مضبوط.

قال أيمن :

- يعني حضرتك عايزنا احنا الي نجيب لمياء دي سكة ونعرف منها كل حاجة ؟

قال حسن :





- بالظبط كده يا استاذ ايمن .. انا هسيبلكم حرية الحركة والتصرف لكن أنا كمان عاوز اعرف وأكمل باقي المكعبات الي ناقصة عندي.  
قالت هناء :

- متفقين يا سيادة الوزير ؟ طيب يا سيادة الوزير تحرياتك بخصوص ماجد فريد وصلت لأيه فيها ؟

أشار حسن المهدي الي أحد رجاله فأخرج ملف ورقي من السيارة وأعطاه الي وليد الذي أخذ يتفحصه هو وأيمن وهناء التي شهقت بقوة وهي تقول:  
- يانهار اسود ؟! تجارة أعضاء وسلاح وآثار.  
قال وليد :



- وايه كمية الاطفال دي كلها ؟  
ثم نظر إلى حسن المهدي وقال :  
- هي الاطفال دي بتروح فين ؟  
قال حسن :

- محدش يعرف ، لكن الظاهر أن ماجد فريد كان عضو فعال ويعتبر زي مؤسس للجماعة دي والظاهر أنه اختلف معاهم لما اكتشف سرهم فتخلصوا منه .  
قال أيمن :

- وهو ايه سرهم ؟ وهي في بلاوي اكر من كده ؟  
ابتسم حسن وقال :

- محدش يعرف ، انا لحد دلوقتي معرفش ايه دوري ولا حتى طلبوا مني اني انفذ مهمة واحدة لحد اللحظة دي .



قالت هناء :

- طيب وهشام ، هل هو كمان عضو في الجماعة دي ؟

قال حسن :

- هشام انسان في حاله من صغره والي عرفته من تحرياتي أنه كان بعيد تماما عن أعمال أبوه ، الظاهر أن ماجد مرضاش يورط ابنه معاه.

قال وليد :

- طيب انا عندي سؤال محرج شوية ، لو تسمحي ، سعاد قالتلنا أن في طقوس غريبة كده بتحصل ...

قاطعه حسن قائلا :

- صدقني يا بني انا مش فاهم حاجة .. لكن الظاهر أنه نوع من أنواع السحر الأسود.. وكمان في حاجات كتير اوي انا مش فاكرها.

قال وليد:

- يمكن بسبب المشروب الي بتشربوه .. فيه مخدر او حاجة .

قال حسن :

- اول مرة معتقدتش أنه كان في حاجة لاني شربت عصير لما كنت في بيت لمياء ، لكن دي كانت شفقة بسيطة جدا معتقدتش أنها تقدر تخدر حتى لو صور صار صغير.

قالت هناء :

- طيب وأثناء الاحتفالات بيكون ايه المشروب الغريب الي موجود في كأس فضي ونحاسي ؟



قال حسن وهو يحاول التذكر :

- انا فاكر الليلة الي تم الاحتفال فيها بانضمامي للجماعة ، لكن صدقيني مش متذكر انا شربت ايه ولا حتى متذكر الطعم ، ولا حتى متذكر ايه الي حصل بعدها ، كل الي انا فاكره اني صحيت تانى يوم لاقيت نفسي نايم في عربيتي وعلى تابلوه العربية في ورقة صغيرة محطوبة .

قالت هناء متلهفة :

- الورقة دي مكتوب فيها ايه ؟

قال حسن :

- مكتوب فيها استنى مننا أوامر جديدة.

قال وليد وهو يستعد للوقوف والرحيل :

- طيب يا فندم احنا هنحاول نفهم السر الي ورا المياء دي وكمان نحاول نفرز الملف ده والي هنوصله هنبلغه لحضرتك عن طريق رقم التليفون الي حضرتك كلمتني منه.

\*\*\*

بعد مرور يومين كان وليد وهناء جالسان على اريكة كبيرة في صالة شقة وبعد

أن ارتشفت هناء بعض العصير من كوبها قالت في ملل :

- أيمن أتأخر.. انت واثق أنه هيعرف يجيب لمياء ؟

هز وليد رأسه مؤكدا وهو يقول :

- اكيد هيعرف .. ايمن عنده طريقة غريبة في إقناع الستات وخاصة الستات الي

ليهم في الشمال .



قالت هناء :

- طيب ما كان ممكن نقابلها في أي مكان برة ، مكنش لازم نقابلها في شقة أيمن.

قال وليد :

- الخطة كانت أننا لازم نسحب لمياء لمكان هتكون هي جاية فيه وهي مش متراقبة ، فمسألة أنها تكون مع زبون دي مسألة عادية مش غريبة بالنسبائها او بالنسبة لحد بيراقبها ، ده لو افترضنا أن في حد بيراقبها.

قالت هناء :

- خطة كويسة .. بس تفتكر أنها هتتكلم ؟

قال وليد :

- مش هتتكلم بسهولة .. بس انا هعرف ازاى اخليها تتكلم.

بعد قليل فتح باب الشقة ودخلت لمياء وورائها دخل ايمن وما أن رأت لمياء أن وليد وهناء موجودين بداخل الشقة نظرت إلى ايمن وقالت :

- مين دول ؟ انتوا ناويين تخلوها جماعي ؟

قالت هناء بعصبية وقالت :

- احترمي نفسك يا ست انتي .

قال أيمن وهو يبتسم الى لمياء :

- اتفضلي اقعدي يا لمياء وهحكيلك .

جلست لمياء على كرسي مريح أمام هناء ووليد وقالت وهي تنظر إلى ايمن الذي

جلس على كرسي آخر بالقرب منهم :

- مين دول يا ايمن ؟



كاد ايمن أن يقول شيئاً إلا أن وليد بادر الحديث وقال :

- ازيك يا مدام لمياء ؟ .. انا الاستاذ وليد ودي الأستاذة هناء زميلتي في جريدة  
الوسام .. وكنا عاوزين ندردش معاكي شوية بخصوص موضوع معين.  
قالت لمياء في ملل :

- انا مش بحب اللقاءات الصحفية ومش مهتمة بيها وبعدين انا جايه هنا لحاجة  
محددة .

قال وليد :

- لما تعرفي احنا عاوزين ندردش معاكي في ايه هتهتمي .

قالت لمياء في تساؤل ممزوج بالضيق :

- وايه هو الموضوع المهم اووي ده ؟

قال وليد :

- ستنا ... عاوزين نعرف ايه قصة ستنا دي ؟

نظرت لمياء الي وليد في دهشة وبدأ التوتر يظهر على ملامح وجهها وحديثها وهي  
تقول :

- ستنا مين ؟ .. انا مش فاهمة انت بتتكم عن ايه ؟

قال وليد :

- انتي عارفة كويس انا بتكلم عن مين يا مدام لمياء .

وقفت لمياء في عصبية ممزوجة بالتوتر وقالت :

- انا معرفش حاجة .. انا عاوزة امشي .

امسك وليد يد لمياء بقوة وهو يقول :



- انتي هتحي كل حاجة وألا ...

نظرت لمياء في عيون وليد بقوة وهي تقول :

- والا ايه؟ .. هتقتلني ؟

قال وليد :

- لأ ..

ثم أشار باصبعه تجاه ايمن وقال :

- شايفة ايمن ده ؟ ده عبيط ومعاه شهادة معاملة اطفال .. يعني لو رش على وشك

الجميل ده مياة نار .. مش هياخد ساعة واحدة سجن .

نظرت لمياء نظرات سخرية الي ايمن الذي كان ينظر اليها متفاجئاً ومندهشاً مما

قاله وليد عنه ، ثم نظرت لمياء إلي وليد مرة أخرى وعيونها ممتلئة بالغضب والثقة

وقالت :

- هو عبيط فعلاً .. لكن ميعرفش يعمل معايا حاجة .. عارف ليه يا استاذ

وليد ؟ .. لأن طول ما احنا جايين في الطريق بعريته ماخدش باله من العربية الي

فيها الجاردات بتوعي الي كانوا ماشيين ورانا .. اصل انا قابلت كتير وممكن راجل

من الرجالة الي بيطلوبوني يكون سبب في اذيتي فكان لازم يكون معايا جهاز

تجسس صغير بيوصل للجاردات كل كلمة بتحصل ما بينا ، ولو حسوا اني في خطر

بيدحقوني .. واكيد هما دلوقتي سمعوا الكلام الي مايينا ومش بعيد يكونوا بيكسروا

دلوقتي باب الشقة دي .

وما أن انتهت لمياء من حديثها حتى تم كسر باب الشقة بقوة ودخل شخصين

ضخمين يحملان مسدساتهما ويوجهها الي ايمن ووليد وهناء ، فابتسمت لمياء بذكاء



وقالت :

- عاوزة اقولك حاجة صغيرة يا استاذ وليد ، مفيش حد حاول يدعبس ورا حكاية ستنا الا وكانت نهايته الموت .

ثم نظرت إلى الشخصين الضخمين وقالت :  
- اقتلوهم.

ولكن فجأة دخل أربعة رجال آخرين وهم يطلقون النار بأسلحتهم تجاه الشخصين الضخمين الذين أصابتهم الأعيرة النارية فماتوا أمام أعين لمياء التي تبذلت ملاحها إلى الخوف ، أما ايمن ووليد وهناء فكانا ينظرون إلى بعضهم البعض وهم لا يفهمون ماذا حدث للتو.

بعد قليل دخل رجل يرتدي جلبابا ممسك بسبحة طويلة ثم تقدم بخطوات ثابتة وهو يمد يده إلى وليد ليصافحه وهو يقول :

- انا الشيخ حسان .. الحمد لله اني لحقتكم في الوقت المناسب.

صافحه وليد وهو يقول باندهاش :

- هوايه الي بيحصل ؟ انا مش فاهم حاجة.

ابتسم الشيخ حسان بود وقال :

- هحكيلك كل حاجة في وقتها .. لكن احنا لازم نمشي من هنا.

ثم نظر إلى رجاله وقال :

- اتخلصوا من الجثث دي .. ونضيفوا الشقة كويس متسبوش فيها أثر لاي حاجة .

ثم أشار إلى أحد الرجال وقال وهو ينظر إلى لمياء :

- وهاتوا المرا دي معانا .. أصل في كلام كتير ما بينا.



على أطراف قرية صغيرة بالصعيد ، وفي منزل صغير جلس الشيخ حسان على الأرض وبجواره وليد وأيمن الذين ارتديا جلبابين اما هناء فقد ارتدت عباءة واسعة لا تليق بجسدها النحيف ، قال الشيخ حسان :

- انا لما اتولدت ، اتولدت على ايد داية اسمها محاسن ، محاسن قالت لابوي ان هيكون ليا شأن عظيم ولازم ياخذ باله مني ويبعدني عن أي عيون غريبة ، ابوي كان راجل طيب ، ومصدقش كلام محاسن خصوصا انها كانت ست عجوزة فابوي افتكر أن كلامها ده مجرد نوع من أنواع البعد عن الحسد والعين ، لكن امي أصرت على كده وان مفيش حد غريب يشوفني وحتى لما كبرت وبقي عندي سبع سنين مكنتش اقدر أخرج من الدار غير وفي حد كبير معايا أن كان ابوي أو امي أو اي حد موثوق فيه ، وأبوي بدأت تتغير نظرتة ليا وخصوصا لما وصلت لسن تسع سنين وبدأ يقول عليا اني بركة وجتله نعمة من ربنا.

قال أيمن في تساؤل:

- بركة ازاي يا شيخ ؟ معاق ذهنيأ يعني ؟ اعزرنى يا شيخنا الي بنقول عليه ده بركة بيكون القصد كده

وكزه وليد وقال :

- هو لسانك الي عاوز قطعه مش عاوز يبطل يقول كلام دبش.

ضحك الشيخ حسان وقال :

- لا يا ولدي.. مش معاق ذهنيأ .. ما انا كويس قودامك اهو ، لكن بركة الي





قال أيمن في تساؤل:

- بركة ازاي يا شيخ؟ معاق ذهنيأ يعني؟ اعزرنى يا شيخنا الى بنقول عليه ده  
بركة بيكون القصد كده

وكزه وليد وقال :

- هو لسانك الى عاوز قطعه مش عاوز يبطل يقول كلام دبش.

ضحك الشيخ حسان وقال :

- لا يا ولدى.. مش معاق ذهنيأ .. ما انا كويس قودامك اهو ، لكن بركة الى  
اقصدها ، هو أن كان عندي ميزة مميزة جدا.

سأله وليد وقال :

- الى هي ؟

ابتسم الشيخ حسان وقال :

- انى اقدر اشوف الكنوز الموجودة تحت الارض بدون حجاب أو مساعدة من حد.  
ابتسم وليد وقال :

- يا شيخ حسان .. مع احترامى لىك هوانت انقذتنا من رجالة لمياء وجايبنا  
الصعيد .. علشان تقولنا انك تقدر تكتشف الكنوز .. الى بيقول كده عن نفسه  
بيتقال عليه دجال .. لا مؤاخذه يا شيخ اعزرنى على صراحتى.

ابتسم الشيخ حسان بهدوء وقال بود :

- لا يا ولدى انا مش دجال .. انا عبد من عباد الله المخلصين وحافظ كتابه والحمد  
لله وعمري ما عملت حاجة تغضب ربنا عز وجل ، لكن يابنى ساعات ربنا بيدي  
عباده هبة من هباته ، وانا الهبة الى عندي تخلىنى اعرف كل حاجة عدا المستقبل



فدي الحاجة الوحيدة الي يعرفها ربنا سبحانه وتعالى.

قالت هناء :

- ممكن نعرف احنا موجودين مع حضرتك ليه ؟

قال الشيخ حسان :

- اصبري عليا يا بنتي لما احكيلكم كل حاجة وساعتها هقولكم ايه سبب وجودكم هنا.

هزت هناء رأسها في موافقة فقال الشيخ حسان:

- لما وصلت لسن عشر سنين اتفاجا ابوي اني قادر اقول القران كامل ، اي سورة اقولها ، واي آية اعرف هي من سورة ايه ورقم الآية كمان ، بالرغم أني مرحتش كتاب ولا اعرف اقرا ولا اكتب ، ودي الحاجة الي خلت ابوي يندهش مني اكثر ولما حاول يفهم حالتي طبيا ملقاش ليها إجابة ، وافتكر كلام محاسن الداية ، ولما دور عليها كانت ماتت ، مكنش يعرف أن الي حفظني القران هو نفر من الجن المسلم اسمه جبريل.

قاطعها ايمن وقال :

- يعني انت يا عم الشيخ مخاوي ؟

قال الشيخ حسان :

- انا مش بحب الكلمة دي ، لكن تقدر تقول إن برفقتي مجموعة من الجن المسلمين ، وهما حاليين موجودين حوالنا بيسمعوا كلامنا وبيحمونا من أهل الشر. اخرج ايمن هاتفه ووضع على الأرض وقال :

- اثبتلي يا عم الشيخ .. وخلي التليفون ده يطير في الهواء.



ابتسم له الشيخ حسان ثم نظر الي الهاتف الذي ارتفع فعلا عن الأرض وظل يرتفع الي الاعلى حتى وصل إلي سقف الغرفة تحت أنظار ايمن ووليد وهناء الذين كانوا مندهشين ، وبعد قليل هبط الهاتف بهدوء مرة أخرى الي أن استقر على الأرض ، فتوترت هناء وقالت :

- بسم الله الرحمن الرحيم.

قال الشيخ حسان:

- يابنتي .. الجن الي حوالينا مسلم ومؤمن زينا واستحالة يأذوا بشر.

ثم أكمل الشيخ حسان حديثه وقال :

- لما اتعرفت على جبريل في أول مرة قالي أن من قديم الأزل في محاربين موجودين

على الأرض يقدروا يحاربوا أهل الشر في العالمين .. عالم الانس وعالم الجن ..

والمحاربين دول بيقدروا يعرفوا الكنوز الموجودة تحت الارض ويقدروا يكتشفوا

الجن لو موجود في مكان ويقدر يقتله ومتقدرش عشيرة الجن أنها تنتقم من

المحارب ده بسبب قوته وان المحارب ده بتكون عنده قوة ربانية وهالة عظيمة

ميقدرش حد يهزمه بسببهم ابدًا .. لكن المحاربين دول طول ما هما لسا اطفال

بيكونوا مطلوبين للسحرة والدجالين لأن دمهم بيكون غالي جدا وبدمهم بيقدر

الدجال ينفذ اي شئ بمساعدة الجن ويقدر من خلال الدم ده تخضعه ممالك جن

كاملة ويكونوا تحت سيطرته ، ومن دم الاطفال دول بيتجدد بيه الشباب والصحة

والقوة ، الاطفال الي من النوعية دي بيتولدوا في ليالي محددة ، احيانا لما بيكون

القمر احمر ، و احيانا في كسوف القمر و احيانا في خسوف الشمس ، وكمان الاطفال

دي ليهم علامات معينة على أجسادهم زي مثلا اللسان .. هتلاقي لسانه في النص



كده هتشوفي خط شقه بالكامل ، أو من العين أن هيكون في عينه اليمين حول  
بسيط اتجاه العين الشمال أو في كف الايد والي هتلاقي فيها خط واحد بيقسمها ،  
الاطفال دول بيطلق عليهن لقب الزوهرين.. ودول الاطفال الي ستنا دي بتاجر  
بيهم.

قال وليد:

- يعني ستنا بتدور على نوعية الاطفال دي علشان الكنوز؟

قال الشيخ حسان :

- علشان حاجات كتير يابني .. والأهم أنها باستخدام دمهم لتجديد شبابها.  
قالت هناء :

- تجديد شبابها ؟

قال الشيخ حسان:

- أيوة .. الي عرفته عن طريق جواسيسي من الجن أن ستنا دي حاليا في عمر  
السبعين لكن باستخدام دم الاطفال قدرت تخلي نفسها شابة وجميلة.  
قال ايمن :

- طيب ياعم الشيخ انت اكيد عارف فين مكانها ، ايه رايك نبلغ البوليس وبكده  
يقبضوا عليها .

ابتسم الشيخ حسان وقال :

- مش بالسهولة دي يابني .. انت محتاج دلائل واثباتات علشان تقدر تبلغ بيها ،  
لكن الموضوع معقد وان الحل الوحيد علشان نخلص من الست دي هو على  
الطريقة القديمة.



قال أيمن :

- قصدك ايه يا شيخ؟

قال الشيخ حسان :

- ستنا دي مش لوحدها معاها رجاله كثير وتحت ايديها سلطات قوية غير أنها من اربعين سنه قدرت تفتح باب السبع غيلان.

\*\*\*

دخل الاستاذ يحيى مراد رئيس التحرير إلى مكتب المحررين فلم يجد أحدا فيه سوى عبير التي كانت جالسة تكتب شئ ما على جهاز اللابتوب الخاص بها فقال لها مندهشا :

- عبير؟! .. انتى قطعتي اجازتك ولا ايه .

قالت عبير بهدوء وهي مازالت تكتب على جهاز اللابتوب:

- أيوة .. نزلت الشغل النهاردة .. في مقال مهم لازم اخلصه.

اقترب منها يحيى وقال :

- هو انتى مش من يومين كلمتيني في التليفون وقولتيلي انك هتاخدي إجازة

اسبوع علشان والدك تعبان .

قالت عبير وهي مستمرة بالكتابة على جهاز اللابتوب:

- بقى كويس واحسن من الاول.

هز يحيى رأسه في فهم ثم اقترب منها وابتسم وقال :

- فكرتي في الموضوع اللي قولتلك عليه ؟

نظرت له متسائلة وقالت :



- موضوع ايه ؟

قال يحيى بعد أن انحنى واقترب برأسه منها وقال :

- موضوع جوازنا .. انتي جميلة اوي يا عبير .. ومش عيب اني أطمع في الجمال ده ..  
وكله بالحلال .. وكل الي هتطلبليه هتلاقيه.

نظرت له عبير بعيون خبيثة لدقائق ثم قالت وهي تبتسم في دلال :

- اصبر وسيبني اخد وقتي في التفكير .

ثم وضعت يدها على خده وداعبته بحنان وقالت :

- قولي .. هم فين باقي الزملاء ؟

امسك يحيى يد عبير وقربها من فمه وقبلها وهو يقول :

- قالوا إنهم مسافرين الصعيد .. يقولوا انهم قربوا يحلوا قضايا القتل الأخيرة.  
هزت عبير رأسها في فهم ثم سحبت يدها ونظرت إلى يحيى بعيون قوية وحادة  
وقالت :

- يالا يا يحيى روح على مكتبك.

نظر يحيى الى عينيها باندهاش ثم تحولت ملامح وجهه الى التوتر المزوج بالخوف  
وبدأ العرق يبرز من جبينه وهز رأسه في موافقة وسار الى خارج الغرفة مسرعا  
متوترا وهو يتخبط بالمكاتب.

\*\*\*

جلست عادة في مكتبها بعد أن انتهت من مكالمه هاتفية مع وليد الذي أخبرها أنه  
يريد معرفة معنى كلمة (ميسالينا) بعد أن قص عليها قصته التي حدثت مع سعاد  
التي أخبرته بتلك الطقوس الغريبة .



بدأت عادة في التفكير ثم تذكرت شيئاً ففتحت هاتفها وأخذت تبحث عن الصورة التي أرسلها لها وليد والتي كانت مكتوب فيها أربعة أحرف قبطية وبعد أن وجدتھا عادة حاولت قراتھا الي أن قالت باندهاش:

- سالي .. اربع حروف .. سالي .. ميسالينا .. دي كلمة ميسالينا.. بس يعني ايه كلمة ميسالينا ؟

اخذت عادة تفكر أكثر الي أن وقفت وذهبت الي مكتبة الجامعة واخرجت قاموس الاسماء وقاموس اخر ضخيم كبير ثم جلست واخذت تبحث داخل القاموسين وهنا اكتشفت شئ وهو أن كلمة ميسالينا هو اسم علم مؤنث ، فأخذت تبحث في كتاب آخر وكتاب اخر الي أن وجدت صاحبة الاسم .

\*\*\*

كان وليد مازال جالسا وعلى وجه علامات التساؤل والحيرة بينما كانت هناء جالسة بجواره تسمع الي ما يقوله الشيخ حسان حينما قال :

- في قديم الأزل قبل ما ينزل سيدنا آدم على الأرض كانت في مخلوقات تانيه عابشة عليها ، وسفكوا دماء وعملوا حروب كثيرة وافسدوا في الأرض ، وكان وسط المخلوقات دي كان الشيطان عايش وسطهم ، في الوقت ده ابليس مكنش عاصي لربنا بالعكس ده كان مؤمن بيه ومش عاجبه الحروب والدمار الي بتحصل في الأرض لحد ما ربنا ارسل ملايكته تحارب المفسدين وتم حبس انفار من الجن وحبس سبعة غيلان وهم آخر غيلان موجودين على الأرض وفضلت مفاتيح السجون دي مع انفار من الجن الي تابوا عن أعمالهم وسكنوا في وسط الكهوف والجحور ، وبعد ما عصى ابليس ربنا ونزل على الأرض مع سيدنا آدم بدأ يدور على



أشخاص يبدأ بعمل بيها جيشه وملقاش غير انفار الجن الي ثابت وبدأ يغريهم  
ويطمعهم ويقولهم أن الأرض خلاص مبقتش ملكهم دي بقت ملك لآدم وذريته ،  
في منهم الي رفض يبقى مع ابليس ، لكن في منهم الي انضم لأبليس ، وقدروا  
يسرقوا مفاتيح السجون وخرجوا كل مخلوقات الجن الي كانت محبوسة ، وكمان حرروا  
الغيلان السبعة وبعد فترة من الزمن حصلت معركة بين جيش البشر وإبليس وكان  
جيش ابليس من الجن والغيلان لكن البشر قدروا يهزموا الجن في معركة عظيمة  
وهرب جيش ابليس ماعدا السبع غيلان الي تم حبسهم في سجن تحت الارض  
ومفتاح السجن ده أدفن في مكان محدش يعرف مكانه لحد اللحظة دي.  
قال أيمن الذي أصابه الملل وبدأ في التثاؤب:

- طيب ازاى بقى ستنا دي قدرت تحرر السبع غيلان ؟  
قال الشيخ حسان :

- مش هي لوحدها الي كانت بتحاول تحرر السبع غيلان ، لأ ، ده كان في قبلها  
شخصيات كتير حاولوا يحرروهم وفي منهم الي مات وهو بيدور على مكان المفتاح.  
قال وليد :

- يعني هي قدرت توصل للمفتاح ؟  
قال الشيخ حسان :

- لأ .. لكن قدرت تفتح فجوة ما بين عالمنا وعالم الغيلان السبعة ، يقدرنا يخرجوا  
منها وهي كمان تقدر تدخلهم ، لكن خروجهم ده مشروط ، وأنه ميقدروش يكونوا  
بره سجنهم اكثر من 12 ساعة لأن بعد مرور الوقت ده الطلاسم الموجودة في الأطواق  
الحديدية الي في رقبتهم بتغير طلسمها كأسلوب امان وفحص وده بيتم جوا سجنهم





وبوجودهم جوا السجن بتاعهم وبس فلو الطلسم مشغلش ومقدرش يعمل الفحص بتاعه كده هيكون نظام الامان بيقول أنهم هربوا وساعتها الطلسم هيحول الطوق الي في رقبتهم لنار تقتلهم .. علشان كده لازم يكونوا في سجنهم ثاني قبل ما يعدي 12 ساعة بالتمام.

قال وليد :

- بص ياشيخ حسان احنا منقدرش نعمل حاجة .. لأن باين الموضوع فيه سحر وحاجات كده .. واحنا بصراحة مش عارفين ايه هيكون دورنا في وسط الحرب دي .  
قال الشيخ حسان :

- علشان كده انا جبتكم هنا في الصعيد .. علشان تفهموا ايه دوركم بالظبط وايه الي هيكون مطلوب منكم.

\*\*\*

في ظهيرة اليوم التالي كان وليد وهناء وأيمن واقفين أمام معبد حتشبسوت وبين الحين والآخر كان وليد ينظر إلي ساعته بتوتر فسأله هناء قائلة :  
- طيب والدكتورة عادة عرفت مين أن احنا هنا ؟  
قال وليد نافيا :

- معرفش يا هناء ، انا لاقيتها الصبح بتتصل بيا وبتقولي استنوني عند معبد حتشبسوت الساعة 2 الظهر.

نظر ايمن إلي ساعته ثم قال وهو ينظر في وجه الناس حوله باحثا :  
- والساعة جت 2 ولسا الدكتورة مجتش.

قال وليد :



- الصبر يا أيمن .. الصبر.

بعد قليل ظهرت سيارة فاخرة حديثة ثم هبطت منها الدكتورة غادة وبعدها ظهرت عبير وهي تهبط من السيارة ، فنظر لهما الجميع في تساؤل ، وما أن اقتربت غادة وجوارها عبير ، حتى هلل أيمن بسبب وجود عبير وقال:

- ايه المفاجآت الحلوة دي ؟

وصافح الدكتورة غادة التي صافحته بود ثم صافحت وليد وهناء ثم صافح أيمن عبير التي كانت تبتسم له ابتسامات خجوله وهو يقول لها :  
- مفاجأة حلوة يا عبير .. بس بابا عامل ايه دلوقتي ؟  
قالت عبير :

- بقى احسن الحمد لله .

قالت غادة وهي تنظر إلى أيمن :

- انا اول ما عرفت انكم هنا كانت عبير معايا ، وعرضت عليا أنها توصلني بعريبتها.  
قال وليد متسائلا:

- عريبتها ؟! .. انا اول مرة اعرف ان عندك عربية يا عبير.

قالت عبير :

- انا معايا عربية .. بس دايمًا كانت مواعيدكم للشغل غير مواعيدي ، علشان كده انت مشوفتنيش وانا بركبها أو بنزل منها ، ومحدث روح قبل كده معايا علشان يشوفها.

قالت هناء وهي تنظر الى غادة :

- واياه الي جمعكم على بعض ؟



ابتسمت عادة وقالت :

- انا لما اكتشفت حاجة مهمة حاولت اتصل ببيكم كذا مرة لكن كل مرة كنت بلاقي تليفوناتكم مقفولة ، فروحت الجريدة علشان اشوفكم فملقتش غير عبير هناك وهي الي قالتلي انكم هنا حسب ما عرفت من مدير التحرير لكن فين تحديدا هي مكنتش تعرف ، لكن أنا باتصلاقي عرفت انتم فين ، وبعدها عرضت عليا عبير أنها توصلني بعربيتها وأنها تيجي معايا وخصوصا انها بتكتب عن مقبرة تجانيني المكتشفة جديد فقالت إنها بوجودها هنا هينفع في التقرير بتاعها .

قالت عبير بلوم الي ايمن :

- انت مش المفروض يا ايمن قايلي انكم في اي خروجة هتخرجوها بعد كده هتاخدوني معاكم .

قال أيمن بخجل :

- بصراحة أيوة .. بس احنا هنا...

قال وليد مقاطعا بحدة :

- معلش يا عبير احنا هنا مش بنتفسح .. احنا هنا في مهمة محددة.

فهزت عبير رأسها في فهم وعلى وجهها علامات الاحراج ، ثم نظر وليد إلى عادة وقال بتساؤل :

- خير يا دكتورة ؟ .. قولتيلي أن عندك معلومات مهمة مينفعش تتقال في التليفون. هزت عادة رأسها وقالت :

- فعلا .. بس الكلام مينفعش هنا .. عاوزين نشوف مكان هادي.

\*\*\*



عام 20 قبل الميلاد

روما

في قصر السيد كلوديا مارسيليا وزوجته السيدة لوسيوس دوميتوس ولدت طفلة جميلة أسمتها امها بأسم "ميسالينا"، لم تكن ميسالينا مجرد طفلة بل كانت زهرة المنزل والتي كانت صاحبة الدلال الأكبر بين والديها فهي كانت الفتاة الوحيدة بين اثنين من الاخوة الذكور، وكانت طفولتها رائعة بحنان أبيها وعلاقتها به لكن تأتي الرياح بما لا تشتهي السفن، فقد توفي أبيها وهي مازالت في سن صغيرة فتزوجت امها بعد ذلك بالقنصل فاوست الدكتاتور الشهير وهو أحد أقارب أبيها وبعد مرور عدة أشهر ولدت امها من فاوست أخ غير شقيق.

كانت طفولة ميسالينا هادئة الى أن بلغت سن العشرون وبدأت تهوي جمع الأشياء الغريبة من جميع أنحاء العالم وخصوصا البلاد التي وقعت تحت سيطرة الإمبراطورية الرومانية، كانت تهوي جمع كل شيء، عملات قديمة، تماثيل، أواني، اي شيء يخطف بريق عيناها.

وكان الكثير من أمراء ونبلاء المدينة يتقدمون للزواج بها، لكن ميسالينا كانت ترفض الزواج فقد كانت محبة للحياة والحرية والزواج سوف يكون تقييد لها وخلال تلك الفترة أصبحت ميسالينا امرأة غنية ومؤثرة في المجتمع الروماني وكانت عمود أساسي من أعمدة قصر كاليجولا الامبراطور الروماني، وكان الامبراطور كاليجولا له ابن اخ يدعى كلوديوس وكان له شهرة وتأثير كبير في المجتمع، وهنا تزوجت ميسالينا من كلوديوس ابن أخ الملك كاليجولا.

وبعد فترة صغيرة قتل كاليجولا وعائلته وأصبح كلوديوس هو الامبراطور الجديد



وبصحبه زوجته "ميسالينا" إمبراطورة بعد أن أعلن الحرس الامبراطوري ذلك. بعدها بدأت تتحول ميسالينا من امرأة ناعمة لطيفة الي امرأة قاسية وطماعه ، فقد كانت تنشئ حفلات ليلية وتدعو الكثير من النساء والرجال وكانت تنشئ مسابقات للجنس في تلك الحفلات وفي إحدى الليالي كانت هناك مسابقة استمرت فيها ميسالينا في معاشره 25 شخصا طوال الليل وبالرغم من ذلك لم تخفي أنها قامت بهذا الفعل المشين ، كما قامت أيضا برفع معدلات القوة الجنسية ، وبعدها قامت بعمل بيت دعارة تحت اسم مستعار من أجل السيطرة على السياسين ، وكانت تدعو في هذا المنزل الكثير من النساء ذو الطبقات العليا لحضور حفلات الجنس وايضا ينضم الي تلك الحفلات رجال السياسة والنبله وشخصيات أجنبية ، فقد كانت تفعل كل ذلك من أجل تضيق الخناق على جميع السياسين المعارضين وإيقاعهم في فخ الجنس وتبادل الزوجات فبالرغم أنها الإمبراطورة إلا أن زوجها العجوز يمكن أن يموت في أي لحظة وسوف يتولى امبراطور آخر الحكم.

لذا قامت ميسالينا بكل ذلك لضمان مستقبل أطفالها والقضاء على اي خطر على عائلتها ، كما قامت بالقضاء على المعارضين لها ولافعالها المشينه بالقتل والاغتيال أو بالنفي .

ولكن بعد أن وصلت ميسالينا لقوة وشهرة وسيطرة جعلت منها تهديدا لكل الرجال منهم الامبراطور كلوديوس نفسه الذي لم يجد حلا آخر سوى بقتلها ، وفي حديقه المنزل كانت ميسالينا جالسه بهدوء بجوار والدتها فاقرب منها جنود القصر لينهاوا عليها ضربا بالسيوف فماتت على الفور.

\*\*\*



- واه الي هيجيب إمبراطورة رومانية في حكايتنا دي ؟  
قالتا هناع التي كانت جالسة وسط وليد وغادة في كافيتريا صغيرة على شاطئ النيل ،  
فقال غادة :

- انتوا لاقيتوا الورقة الي مكتوب عليها جزء من اسمها في مكان مقبرة الكاتب  
تجانيني ، صح ؟  
قال وليد موضحا :

- مش في المقبرة ذاتها .. هناع لاقيتها في مكان قريب من المقبرة وكان باقي الورقة  
محروقة زي ما حضرتك شايفة .

أخرجت غادة كتيب صغير من حقيبتها وأخذت تقلب بين أوراقه الي أن وصلت  
إلى صفحة معينه ثم إشارات إلى وليد بيديها إلى صفحة الكتيب بعد أن أعطته له  
وقالت :

- بعد ما كلوديوس قتل ميسالينا اتجوز واحدة اسمها اجرينا ودي واحدة كان ليها  
مذكرات غريبة والبعض شكك في صحتها اصلا واعتبروا أن كل الي كتبه غير  
صحيح ، المهم وسط الي كتبه اجرينا أنها بتقول إن لما شافت كلوديوس لسا حزين  
على ميسالينا قررت تتخلص من كل حاجة تخصها وفي الوقت الي كانت بتعمل فيه  
كده لاقيت تمثال غريب ولما اتحرت عنه عرفت أنه تمثال لمعبودة آشورية قديمة ،  
اسمها لاماتشو.

قالت هناع :

- ولا ماتشودي آلهة في العصر الآشوري ، ايه برضه علاقتها بميسالينا.  
قالت غادة :



- لازم تعرفي يا هناء انك علشان تحلي لغز كبير لازم تحلي قبلها الالغاز الصغيرة ،  
لاماتشودي كانت شيطانة بتخطف الاطفال وبتسفك الدماء .

قال وليد متفقا :

- انا مع حضرتك يا دكتورة غادة ، بس ايه سر لاماتشودي كمان ، مع أن حضرتك  
اكدي أن المذكرات دي مش صحيحة .

قالت غادة :

- جوا كل كذبة يا وليد في جزء من الحقيقة .

ثم وضعت يدها في حقيبتها مرة أخرى وأخرجت ورقة مطوية ثم فتحتها واعطتها الي  
وليد وهي تقول :

- دي صورة لبردية .. البردية دي جزء من مذكرات جندي مصري كان من ضمن  
جيوش الملك تحتمس الثالث ، الجندي ده بيقول في مذكراته أنهم بعد ما كسبوا  
معركة مجدو وفي أثناء وجودهم في المدينة اكتشفوا أن في ساحرة أو شيطانة كانت  
بتقتل في الجنود المصريين وأنها كانت برضه بتخطف الاطفال وتقتلهم فأمر الملك  
تحتمس الثالث بقتلها وحرق بيتها .

ثم نظرت بقوة إلي عيون وليد وقالت في تحد واضح :

- عارف الساحرة أو الشيطانة دي مذكورة باسم ايه في البردية ؟

هز وليد رأسه نافيا ، فقالت غادة في نصر :

- كاهنة لاماتشو .

قالت هناء وهي تنظر إلي الورقة المنقوش عليها بحروف هيروغليفية :

- حضرتك وصلتي للبردية دي ازاى ؟



قالت غادة :

- بطريقتي الخاصة.

قال وليد :

- احنا كده عرفنا أساس الحكاية .

ثم قال مفكرا :

- ومعنى كده أن ميسالينا عملت عهد مع الشيطانة لاماتشو ، وسبب أفعالها الغربية والقتل وحفلات الزنا مكنش الغرض منه سياسي و بس ده كان كمان إرضاء للشيطانة الي عملت معاها العهد.

قالت غادة :

- جميع المصادر بتقول إن ميسالينا ماتت أو اتقتلت وهي لسا جميلة وكأنها في عز شبابها.

قال وليد مفكرا :

- في عز شبابها .. الجملة دي بتفكرني بحاجة.

قالت هناء وقد فهمت الي ما يشير إليه وليد :

- احنا كده حلينا اول طرف في اللغز ده .

قال وليد وهو ينظر إلي الفراغ مفكرا :

- ناقص نوصل لنهايته.

\*\*\*

في المساء كان وليد وهناء وأيمن جالسين على الأرض أمامهم صينية كبيرة ممتلئة بالطعام كان وضعها أمامهم أحد رجال الشيخ حسان الذي لم يظهر طوال هذا اليوم





لأن كما أخبرهم أحد الرجال بأن لديه الكثير من الامور ، وبعد أن انتهوا جميعا من تناول الطعام قال أيمن :

- بس الجماعة جم صد رد ورجعوا على طول مش كانوا يقعدوا يومين معانا.  
قال وليد :

- يقعدوا فين يا أيمن ؟ احنا اساسا هنا ضيوف ، وبعدين الدكتوراة عادة عندها شغل وبيت ولازم ترجع لهم .. كتر خيرها أنها جتلنا لحد هنا علشان تعرفنا المعلومات دي كلها.

قال أيمن :

- بيني وبينكم انا كنت عاوزها تقعد ، اهو على الأقل تشجع عبير تقعد معانا.  
قالت هناء بمشاغبة :

- هي المسألة كده يا استاذ أيمن ؟! علشان خاطر عبير تقعد .. صح ؟  
فضحك وليد وقال :

- صحيح قولي .. انت اخدتها وروحت فين ؟ ، مجتوش معانا ليه الكافيتريا علشان تعرف وصلنا لايه ؟

قال أيمن :

- بيني وبينكم لاقيتها فرصة اني اعرف اتكلم معاها لوحدنا ، بعيد عن الشغل وبعيد عنكم وعن اي حد.

قالت هناء :

- وعرفت تتكلم معاها ؟

قال أيمن في سعادة :



- طبعا .. عاوز اقولكم أنها لطيفة اوي وقضيت معاها وقت كويس.

قال وليد معاتبا وهو ينظر إلي هناء :

- المعلم قاعد يحب وسايبنا غرقانين في القضية دي .

قال أيمن متأففا :

- اسمع يا عم وليد انا وقعت معاكم الوقعة دي غصب عني ، والموضوع بالنسبالي

كان خدمة ليكم .. انا ماليش في جو القضايا بتاعكم ده.

قال وليد مازحا :

- ليك بس في الجنس الناعم .

قال أيمن في شئ من الغضب :

- جرا ايه يا وليد .. هو انا قاعد وسطكم علشان تقسم عليا في الكلام.

ثم قام واقفا وأمسك طرف جلبابه وقال :

- انا سايبلك القعدة كلها وداخل انا .. تصبحوا على خير .

خرج ايمن من الغرفة وعلى وجهه تظهر علامات الضيق ، فنظرت هناء إلي وليد معاتبة

وقالت له :

- مكنش لازم تخرجه كده قودامي.

قال وليد وهو ينظر الي باب الغرفة :

- ايمن مش بتاع أنه يشيل مسؤولية واحدة ولا حتى يعمل بيت وأسرة ، ايمن عاوز

الحاجات السهلة وحرام عليه يلعب بينت غلبانه زي عبير.

قالت هناء في ضيق :



- مش ايمن لوحده يا وليد الي مش عايز يشيل مسؤولية بيت وأسرة.. في واحد اعرفه يعرف واحده وبيحبها ومع بعض بقالهم سنين لكن لحد دلوقتي مقررش أنه يشيل مسؤولية..

ثم وقفت وقالت بضيق :

- مش ايمن لوحده يا وليد الي مش عاوز يشيل مسؤولية.  
ثم سارت الي أن وقفت أمام باب الغرفة وقالت :

- انا طالعة اناام تصبح على خير.

بعد أن خرجت هناء كان وليد مازال جالسا مكانه وقد فهم ما تقصده هناء بقولها هذا ، أنه يعرف هناء منذ فترة طويلة ويعرف شعورها بالنسبة له وهو أيضا يفهم شعوره لها ، وكم كان يتمنى داخل نفسه أن يعترف بحبه لها ، لكن خوفه من المستقبل كان سدا منيعا لكل ذلك ، كان يخشى أن يكون مشروع الزواج سببا في هدم هذا الحب الهادئ ، فكم من زيجات أقيمت على أسس الحب والاهتمام لكن مع الضغوط والمشاكل تتحول تلك العلاقات من حب الي نزاعات داخل قاعات المحاكم ، كان يعلم من داخله أن لا يحب هناء فقط ، بل يعشقها ، وان كانت الها لقدسها ، لكن الخوف من الغد ، الخوف مما قادم كان هو السبب الحقيقي ، وكان يعلم أنه لا يمتلك تلك الشجاعة ليغامر بحبه ويقامر به مع الزمن فهو لا يعلم كيف سوف تكون النتيجة الحتمية لذلك الحب.

\*\*\*



## - 7 -

في غرفة واسعة قد أنارت نار الشموع أركانها وقفت ستنا وعلى رأسها هذا الاشارب  
 الحريري التي أعادت أن تضعه عليها لاختفاء ملامحها وهي تعطي ظهرها لباب تلك  
 الغرفة فطرقت ذات الملامح الآسيوية عليها الباب ودخلت وسارت الي أن وصلت  
 خلفها واعطتها خنجرا غريب الشكل ، ثم أشارت لها بيديها أن تغادر ، وبعد أن  
 خرجت ذات الملامح الآسيوية، وضعت الخنجر على كف يديها الأيسر وصنعت  
 جرحا غائرا فانسال القليل من الدماء ثم صعدت على منصة حجرية ووقفت  
 وقالت بصوت عال :

- ايها المنشقون ، ايها المسجونون ، بحق عهد ميسالينا ، اجيبوا

مر بعض الوقت ولم يحدث شئ ، فقالت ستنا بقوة وبلغة غريبة :

- سالع متوبلم كنسشيص وكا سلفور بهلوك .. بحق عهد ميسالينا انفتحي ايتها  
 البوابة.

ثم قالت وهي تفتح ايديها كأنها تستقبل أحدا :

- بيسل عفقور هشكب سلفيفور .. يا منشقون اؤتوني بأشد ثلاثة منكم.

هنا اهتزت الأرض قليلا ثم بدأت رياح تأتي من مكان غير معلوم وظهرت نيران  
 فجأة وهي تتشكل في الهواء وكلما اشتدت الرياح زادت النار حجما وحرارة الي أن

خرج منها ثلاثة غوريالات ذكور ضخمة الحجم ، وكانت الغوريالات تتصارع

بين بعضهم البعض في غضب ، لكن ستنا التي كانت واقفة أمامهم صرخت بهم

وقالت :



- توقفوا ..

فنظر إليها الغوريلا الذكور في غضب وكادوا أن يهجمون عليها إلا أن ستنا عصرت يديها الجريحة بقوة فتساقطت بضع قطرات من الدماء على الأرض فتبدلت نظرات الغوريلا الغاضبة الى نظرات خضوع وجوع وعطش وساروا الي أن وصلوا إلي قطرات الدماء الموجودة على الأرض واخذوا يتشمموها ويلحسونها بالسنتهم في عطش ، فقالت ستنا :

- نفذوا المطلوب وهو فرلکم الي انتم محتاجينه

ثم نزلت من على المنضدة الحجرية واقتربت منهم وهي تقول :

- انتم عرفتوا مكانهم .. انا مش عاوزاهم مقتولين .. انا عايزاهم يعيشوا في رعب وخوف.

قال أحدهم ببضع كلمات غير مفهومة في غضب وهو يشير بيده الي ستنا ثم وضع يده على الطوق الذي يحيط رقبته، ففهمت ستنا حديثه وقالت :

- بالنسبة للوقت فأنتم وشطارتكم ، أما المسألة الثانية فأنا بمحاول الاقي ليها حل .

اقترب منها غوريلا أخرى وعلى وجه بدأت تظهر علامات الغضب مع تلك الأصوات والشخير التي تخرج من أنفه ولعابه المسال على فمه وقد كشر أنيابه ثم قال كلمات غير مفهومة فحاولت ستنا أن تقول شيئاً لكن الغوريلا لم يمهلهما الوقت وضرب جسدها بقبضة يده فطارت ستنا في الهواء ووقعت على الأرض وهي تتأوه ، فسار إليها الغوريلا وما زالت علامات الغضب تبدو على وجه فرفعت ستنا يديها المصابة والغارقة في الدماء لتوقفه وهي تقول :

- متنسوش في عهد ما بينا .. وانا نفذت كل المطلوب مني .. وصدقوني انا قربت



اعرف فين مفتاح سجنكم وهيتم تحريركم قريب .. انا عرفت مين الي هتساعدني ..

فاقتربوا منها يتسائلون في صمت ، فقالت وهي تحاول الوقوف على قدميها :  
- لاماتشو .. لاماتشو هي الي عارفة فين مكان المفتاح.

بدأ صياح ذكور الغوريلا يدوي في الغرفة وهم يصرخون ويضربون صدورهم في قوة بايديهم معلنين في فرح على انتهاء سجنهم وتحريرهم ثم هزوا رأسهم اليها في إشارة أنهم موافقون على مهمتهم التالية ثم انطلقوا مسرعين الي باب الغرفة وقبل أن يصلوا إليه كانوا قد اختفوا في الهواء ، بعدها وقفت ستنا أمام المنضده في إرهاب وتعب وهي تفتح كتاب غريب صنعت اوراقه من الجلد البشري ووقفت عند صورة غريبة تظهر شئ ما برأس اسد واذني حمار ..  
فلقد كان هو الوقت المناسب لاستدعائها ..  
لاستدعاء الشيطانة لاماتشو ...

\*\*\*

لم تكن هناء من هؤلاء الأشخاص الذين ينامون نوما عميقا لدرجة أن وقع عليهم سقف الغرفة فلم يشعروا به ، كلا ، لم تكن هناء كذلك ولن تكون بل كانت تستيقظ من نومها احيانا بسبب اصوات عقرب الثواني التي بالساعة المعلقة على حائط غرفتها حينما يسود الصمت الشديد ، وفي تلك الليلة كانت هناء نائمة ولكنها شعرت بهمسة باردة تمر على وجهها ، ففتحت عينيها لتجد نفسها نائمة على أرض قاحلة مظلمة ، فسارت بين نتوء الصخور التي تمتلئ الأرض وهي تصرخ بصوت عالي بسبب الخوف والبرودة والظلام.



فأخذت تركض كالمجنونة، كانت بلا حذاءٍ في قدميها وبثياب النوم، وشعرها ثائرٌ خلف ظهرها بجنون وأخذت تركض بلا هدف وهي لا تدري أين هي فلقد كان المكان غريباً، أكوامٌ من التراب وتلالٌ وأحجارٌ في كلِّ مكانٍ من حولها، خرابٌ ودمارٌ ودخانٌ يتصاعد من لا شيء، الغبار يعمي عيونها.

أخذت تنادي على وليد، على ايمن، على حسان، على أبيها وأمها المتوفين، لكن دون إجابة، دون مساعدة، دون أي احد، لم يكن هناك أي شيء سوى ذلك الظلام الضبابي المخيف والتي لا تستطيع رؤية أصابع يديها فيه، ولكنها تسمع اصوات الأنين لأشخاص من مكان ما، لا تعرف من هم ولكن أصواتهم تدل على أنهم يعذبون، أنها لا تراهم ولكنها تشعر بما يعانونه من ألم، وفجأة جائها صوت من مكان غير معلوم وهو يقول :

- هتموتي انتي كمان وهيكون مصيرك زيهم .. مصيرك هيكون زيهم ياهناء.

صرخت هناء صرخات عالية، وبعدها أخذت تركض كالمجنونة بلا هدف، لا تدري ماذا يحدث وأين هي، لكنها رأت ذلك الشيء الأسود وهو يقف في نهاية الطريق، كان غير واضح المعالم ولكنه كان طويلاً جداً، يصل لأكثر من ثلاثة

أمتار، شهقت هناء بفرع وهي لا تدري ماذا يريد ذلك الشيء منها؟

بدأ الشيء الأسود في الاقتراب منها بسرعة كبيرة، فشعرت بتلك الوجزة في صدرها والألم، كانت تشعر بأنها ستموت، ولكنها أخذت تركض والهواء الشديد من حولها يحرك كل شيء لأعلى، أخذت الصخور الصغيرة المنتشرة على الارض ترتفع لأعلى وتلتف حول هناء في صورة دائرية، وكأنها دوامة وهي مركزها، دوامة تستعد أن تضيق عليها لتبتلعها وتمزقها، وكانت لا تدري إلى أين تذهب وأين ستحتمي مما



هي فيه، وأخذ صوت هذا الشيء يقول بلا توقف :

- هيكون مصيرك زيهم .. مصيرك هيكون زيهم ياهناء.

وهنا لم تستطع هناء أن تتنفس وكانت تشعر بالاختناق وكادت تلفظ أنفاسها الأخيرة من شدة الرعب والألم، فصرخت بكل ما تملك من قوة فشعرت بتلك الهزة الأرضية التي تهز كل شيء من حولها والأرض تتحرك من تحت قدميها، وصوت يردد اسمها من بعيد:

- هناء .. قومي يا هناء.

فتحت هناء عينيها والفرع يسيطر على ملامح وجهها فوجدت وليد جالسا على السرير بجوارها وقد ظهر على وجه علامات القلق الممزوجة بالتوتر والشيخ حسان يقف عند باب الغرفة وعلى ملامحه الهدوء وهو ينظر إليها في تركيز، فقال وليد :

- اطمني يا هناء ، ده كان كابوس.

\*\*\*

في غرفة هناء جلس وليد على طرف السرير بينما كانت هناء تشرب بعض المياه من كوب زجاجي ، فتقدم الشيخ حسان وجلس على كرسي صغير وقال :

- الظاهر أن ستنا دي بدأت الحرب ، وعليكم انتم تحديدا.

نظرت له هناء متسائلة وقالت :

- ازاي يعني بدأت الحرب ، انا مش فاهمة حاجة.

قال الشيخ حسان :

- أما تبقي انتي وأيمن و وليد تحلموا انتم التلاته بكوايبس في وقت واحد وفي ليلة واحدة يبقى ده معناه أن الست الشيطانة دي بدأت تسلط عليكم غيلانها...





والغرض من كده هو انكم تتجننوا.

نظرت هناء إلي وليد في فزع وقالت متسائلة :

- انت كمان حلمت بكابوس؟

هز وليد رأسه في تأكيد ، فسألته هناء مرة أخرى وقالت :

- حلمت بأيه؟

قال وليد :

- مش عاوز احكي تفاصيله .. لكنه كان فظيع.

قالت هناء متسائلة:

- وأيمن؟

قال وليد :

- الظاهر أن ايمن كان كابوسه افزع مننا .. الرجاله لاقوه بيجري وسط الغيط وهو

بالكلسون والفانلة وبيقول وربنا ما انا الي قتلتة ده الحمار الي عمل كده.

ثم كتم وليد ضحكته فتخيلت هناء منظر ايمن بهذا الوضع وفي تلك الساعة

المتأخرة فابتسمت وقالت :

- يخربيت عقلك يا أيمن ، المهم هو عامل ايه؟

قال الشيخ حسان وهو يبتسم :

- هو كويس .. ودخل نام تاني .. انا اسف يا جماعة اني مكنتش موجود في البيت ولا

حتى سبتلكم حراسة تقدر تمنع الغيلان دي عنكم ، مكنتش متخيل أن الحرب

تبدي من هنا ، من بيتي ، لكن اوعدكم من دلوقتي اني مش هسكت وهتكون

النهاية قريبة جدا.



في مساء اليوم التالي جلس ايمن و وليد والشيخ حسان في بهو المنزل ، وكان وليد يلعب في هاتفه والشيخ حسان يقرأ بعض آيات القرآن الكريم من مصحفه أما ايمن فكان يتحدث مع أخته عبر الهاتف ، وبعد قليل كان انتهى ايمن من هاتفه فقال :

- وبعدين ؟

أشار له الشيخ حسان بيده بأن يصبر وبالرغم القلق الواضح على ملامح وليد وأيمن إلا أن الشيخ حسان كانت ملامحه تدل على القوة والهدوء وما هي إلا لحظات حتى سمع الجميع صراخ هناء في غرفتها ، فهرول الجميع الي غرفتها وما أن دخلوها حتى وجدوا هناء جالسة على السرير منكمشة برعب تصرخ وهي تنظر إلي هذا المخلوق العملاق البشع الذي يشبه الغوريلا وكأنه ظهر من الجحيم ذاته .

كان ذلك المخلوق واقفا يصرخ داخل دائرة تم كتابة داخلها الكثير من الرموز والطلاسم قد رسمها الشيخ حسان مسبقا كفخ لهذا المخلوق الملعون ويبدو أن الفخ قد نجح ، نظر الشيخ حسان الي وليد وقال :

- محدش يطلع على سرير هناء علشان ميكسرش حاجز الحماية الي انا عمله ليها ، ومحدش يقرب من الكائن ده .

ثم سار الشيخ حسان ووقف خارج الدائرة وهو ينظر إلي هذا المخلوق الذي كان يصرخ في وجه ويسيل لعابه من فمه وبالرغم من الرعب الذي كان يسود الإرجاء إلا أن الشيخ حسان كان واقفا ثابتا قويا هادئا كأن من اعتاد على تلك الأجواء الفظيعة.

كان المخلوق يزجر بغضب وهو ينظر إلي الشيخ حسان في تحد وكلما حاول أن يمد



يده ليمسك بالشيخ حسان كانت يديه تضربها شرارات كهربائية قادمة من إطار الدائرة التي تحبسه ، فقال الشيخ حسان :

- انت نهايتك الليلة دي .

ثم قال :

- بقوة بسم الله الرحمن الرحيم وبالصلاة والسلام على رسول الله، يحرق كل شيطان او جن أو غول، أقسمت عليكم يا أصحاب الجنود القوية أجيئوا أنتم وخدامي وأعواني يا جنودي وجنود الخير ، أقسمت عليكم بالعهد المعهود ، انزلوا بخيولكم ووزرائكم وأعوانكم وخدامكم ، وأحرقوا هذا الملعون.

وما هي إلا لحظات حتى بدأت قيود حديدية تخرج من أسفل هذا المخلوق الشنيع وترتفع وكان المخلوق يحاول الإفلات منها ويبعدها عنه لكن كانت السلاسل أكثر سرعة الي أن التفت حول جسده وقيدته بقوة ، فأخذ الحيوان يصرخ ويزمجر في غضب وبعد قليل بدأت رائحة احتراق لحم تنتشر في الإرجاء الي أن ظهرت نيران قوية على جسد المخلوق فاحرقته تماما الي أن تحول المخلوق الي رماد عدا ذلك الطوق الحديدي الذي كان يحيط برقبته.

وقف الشيخ حسان وقال :

- الحمد لله الذي نصرنا على أهل الشر .

ثم أمسك بالطوق ووضع بين طيات جلبابه ونظر الي وليد وأيمن وهناء وقال :

- كده بوجود الطوق معايا هيتم اكتشاف حالة هروب من سجن الغيلان وهتتغير الرموز والبوابه الي بيخرجوا منها مش هيعرفوا يستخدموها تاني.

قال وليد :



- لكن الست الي بيقلوا عليها ستنا دي اكيد هتلاقي طريقة تانيه علشان تفتح البوابة وتخرجهم .

قال الشيخ حسان :

- مش هتدحق لأن احنا هننقل الحرب على أرضها.

كان ايمن قد لاحظ نظرات الخوف والرعب على عيون هناء وملاحمها فاقترب منها ليطمئن عليها ناسيا ما أخبره عنه الشيخ حسان بعدم الاقتراب من سرير هناء حتى لا يتم كسر حاجز الحماية الذي صنعه لها ، فجلس ايمن بجوارها وهو يبتسم لها محاولا تهدئتها وقال :

- عامله ايه دلوقتي يا هناء ؟

فلاحظ الشيخ حسان ما فعله ايمن فقال فزعا :

- انت عملت ايه ؟! .. انا مش قولت .....

وقبل أن يكمل الشيخ حسان جملته حتى تهشم زجاج الغرفة فجأة وبقوة وتناثرت قطع الزجاج على الجميع وبعد ثوان امتلأت الغرفة بدخان اسود ورائحة كريهة قوية فحاول الشيخ حسان أن يقول شيئا لكن كان هناك كرسي خشبي موجود في ركن الغرفة اصابه في رأسه بعد طار إليه في قوة ، فسقط الشيخ حسان مغشيا عليه ، حاول وليد أن يخبر الجميع أن يهربوا من هذا المكان إلا أن هناك ضوء احمر قوي ظهر بالقرب من السرير الذي تجلس عليه هناء وايمن فاقترب منهم الضوء وأخذ يتزايد بضياؤه فأبلتلعمهم وبعد انتهاء كل هذا ، وجد وليد أن ايمن وهناء قد اختفيا تماما.

\*\*\*



كانت هناك ايادي تسحب هناع سحباً تدخلها الى قفص حديدي وهي تشعر بالدوار وبعد أن تم وضعها داخل قفصها رأت شخصين آخرين يسحبون ايمن ويجرونه وهي تسمع صوت الاقفال والجنازير لقفص آخر بجوارها ثم القوبه بداخل القفص وهو مغشياً عليه وبعد قليل تم فتح قفص ثالث واخرجوا لمياء من داخله والتي كانت تصرخ بفرع وعلى وجهها علامات الهلع والرعب وهي تقول :

- انا معترفتش بحاجة .. مقولتش حاجة .

لكن يبدو أن الرجلين الذين كانوا يسحبونها من على الأرض بقوة لم يعطوا اهتماما كثيرا بما تقوله لهم ثم توجه الحارس الثالث الى قفصا وحيدا موجود في ركن هذا المكان الشبيه بزنزانه العصور الوسطى ، وما أن فتح القفص حتى بدأت اصوات الزئير والزججة تتصاعد من داخله ، ثم تم القاء لمياء داخل القفص وعلى اصوات صراخ لمياء واهتزاز القفص وتهشم العظام واصوات العويل كانت هناع تنكمش في قفصها خوفا وهي تتمنى من داخل قلبها أن يأتي إليها من يستطيع إنقاذها.

\*\*\*

في منتصف الليل كان وليد والشيخ حسان واقفين بالقرب من منزل صغير قديم من طابق واحد محاط بسور متوسط الارتفاع يراقبونه في صمت وبعد قليل ، قال وليد هامسا وهو يلتفت يمينا ويسارا :

- انت متأكد ياشيخ حسان أن هو ده المكان الصحيح؟

هز الشيخ حسان رأسه مؤكدا وهو يمسك طرف جلبابه ويضعه في فمه ، فقال وليد بتوتر:

- بس ده بيت صغير وقديم ودور ارضي والمعلومات الي عندنا بتقول انه قصر.



قال الشيخ حسان :

- مش وقت اسئلة كثير يا وليد .. هتعرف كل حاجة في وقتها.  
ثم وضع طرف جلبابه في فمه مرة أخرى وسار الى المنزل وتسلق السور فاتبعه وليد  
ومثل جنود الكوماندوز راحوا يركضون الى المنزل الصغير والصمت يملئ المكان  
ويوحى بأن ليس هناك شخص حي وعندما وصلوا الى احدى النوافذ أخرج الشيخ  
حسان من طيات جلبابه أداة ما وأخذ يعالج المزلاج الى أن فتح النافذة وفي لحظات  
صغيرة كانوا داخل المنزل.

اشعل وليد كشاف هاتفه ، أنهم في مكان يبدو كمخزن ، وهناك الكثير من  
الصناديق والزجاجات الفارغة وبعض الاثاث القديم ، فراحوا يستكشفون المكان  
في هدوء حذر ، وهناك في ركن المخزن كان هناك سلم يؤدي إلى طابق ارضي ، فأشار  
وليد الى الشيخ حسان إليه فرفض الشيخ حسان أمر هذا الدرج وأخذ يتفحص  
الجدران ، فأن من ضمن ما أخبرته به لمياء أثناء احتجازها لديه وقبل خطفها من  
رجال ستنا كانت أخبرته وقالت إن هناك مدخل صخري كانت تمشي فيه وعلى  
طريق غير ممهد وهذا يشير إلى فتحة في الجدار تؤدي الى مدخل صخري ، فراح  
الشيخ حسان يمسح الجدران بيده بحذر وهناك وجده بعد أن طرق عليه عدة  
طرقات خفيفة وما أن دفعه بكتفه الى الداخل حتى فتح باب المدخل.

ابتسم الشيخ حسان وهو ينظر إلى وليد الواقف خلفه مندهشا لما يراه ثم نظر  
ودخل وبالفعل كانت هناك درجات حجرية تقود الى الأسفل ومصابيح كهربائية  
خافته ثم إن هناك طريق حجري غير ممهد يمتد بضعة أمتار بعدها تجد مدخلا الى  
اليمن يقود الى بهو القصر ، ذلك القصر الذي انشأ تحت الارض حتى لا يجده أحد



وهناك على اليسار مدخل مغلق بقضبان حديدية ، كانوا يشمون من وراءه رائحة كريهة نفس رائحة اقفاص الأسود والضباع في حديقة الحيوان ، وهناك على الأرض كانت هناك خشبة كبيرة فمسكها الشيخ حسان واعطاها الي وليد وقال :  
- الي يقابلك اديله بالشومه دي على رأسه ومترحمهوش.

ثم سار بحذر متجها الي بهو القصر وخلفه وليد الذي حمل الخشبة كسلاح يحمي به إذا قابلته بعض الأمور ، كانت هناك إضاءة زرقاء تغمر أرجاء القصر هكذا تأكد وليد وهو ينظر إلي القصر أنه في المكان الصحيح ، فأشار له الشيخ حسان بيده الي أحد الأبواب وقال همسا :

- الباب الي هناك ده هتفتحه هتلاقي ورا منه باب حديد برقم سري.  
ثم أعطاه ورقه صغيرة وهو يقول :

- الرقم السري في الورقة دي ، بعد ما تفتح الباب هتلاقي صحابك هناك خدهم وأخرج من المكان ده زي ما دخلنا منه ، وملكوش دعوه بأي حاجة هتحصل هنا..  
مفهوم يا وليد ؟

هز وليد رأسه ثم أمسك بالخشبة جيدا وسار متوجها إلي باب الغرفة ، أما الشيخ حسان فقد صعد الدرج ثم فتح باب موجود جهة اليسار ، فدخل فرأى أنه في قاعة حجرية كبيرة فعرف أنه في المكان الصحيح وفي قلب القاعة كان هناك منضدة صخرية عملاقة تقف عليها ظل امرأة .

\*\*\*

فتح وليد الباب الحديدي حتى وجد نفسه داخل زنزانه حجرية كبيرة ممتلئة بالاقفاص وعند اول قفص وجد بداخله جثة رجل تفوح منه رائحة نتنة وقد



انتزعت احشائه فشعر وليد بالاشمئزاز ووضع يده على أنفه من شدة الراححة ، ثم سار متوغلا باحثا عن هناء وايمن ، إلى أن وجدهما داخل القفصين ، فقالت هناء بفرع :

- وليد .. وليد .. خرجنا من هنا بسرعة.

فأشار لها وليد وهو يضع إصبعه على فمه إشارة إلى أن تلتزم الهدوء ثم نظر الى باب القفص فوجد أنه مغلق بقفل ، فقال هناء بهمس :

- المفاتيح مع واحد من الحراس ، شوفته وهو ييقفل باب قفص لمياء قبل ما يرموها ....

لكنها لم تستطع أن تكمل جملتها واجهشت في البكاء فطمئننها وليد وقال :

- اطمني يا هناء انا هشوف فين المفاتيح وهاجي بسرعة.

ثم نظر الى ايمن وقال :

- خد بالك منها .. ولو حصل اي حاجة أدوني إشارة .

هز ايمن رأسه في فهم ، فسار وليد باحثا بين الإرجاء ، وفي إحدى المرات وجد أحد الحراس واقفا يشعل سيجارته ، فسار وليد في هدوء وحذر وهو يرفع خشبته بيديه الاثنتين وما أن وصل خلفه حتى ضربه بقوة على رأسه ، ثم أخذ يبحث في جيوبه الى أن عثر على المفاتيح فعاد مسرعا وأخرج هناء من قفصها فاحتصنته هناء في قوة كمن عثرت على الامان بين يديه ، ثم اخرج ايمن الذي شكره ثم ساروا عائدين الى المخرج وهم يسرعون الخطى ، لكن فجأة ظهر حارسين آخرين أمامهم فضرب ايمن أحدهم لكمة قوية جعلت الرجل يترنح وتنصدم رأسه بأحد الاقفاص فسقط مغشيا عليه أما الثاني فقد ضربه وليد على رأسه بالخشبه فسقط الرجل





صريعا على الأرض.

وما أن فتح وليد الباب الحديدي حتى وجد أمامه امرأتان واحدة منهم ذات ملامح أوروبية والأخرى آسيوية وتتوسطهما امرأة ترتدى فستانا ابيض واسعا وتضع على رأسها قماشة حريرية بيضاء تغطي ملامح وجهها ، نظرت إليها هناء وهي تقول :  
- دي اكيد ستنا الي بيقولوا عليها .

أزاحت المرأة القطعة القماشية عن رأسها لتظهر ملامح وجهها تحت عيون ونظرات وليد وأيمن وهناء الذين ما أن تمعنوا في ملامحها حتى قالوا سويا في دهشة وحيرة :  
- عبير ؟!

\*\*\*

طار ظل المرأة التي كانت واقفة على المنضدة الحجرية الي أن هبطت ووقفت على مقربة من الشيخ حسان الذي كان واقفا بثبات وهدوء ، فمال ظل المرأة برأسها يمينا ويسارا في بطئ شديد ثم قالت بصوت أشبه بصوت فحيح الشعابين :  
- تعرف انك ياشيخ حسان مشهور جدا في عالمنا .  
قال الشيخ حسان :

- ايه الي خلاكي تنزلي تاني على أرضنا .. انتي منبوذة من عالم الجن والشياطين بسبب الحرب الي كنتي هتتسبي فيها ما بينهم ، ومكانك دلوقتي على كوكب الزهرة وممنوع نزولك الأرض تاني .  
ضحكت بأسلوب ثعباني ثم قالت :

- ده انت عارف تاريخي كويس ؟ .. زمان الناس كانوا بيعبدوني سفكوا دم كثير تحت تماثيلي علشان بس ارضي عنهم ، ومن رعبهم مني بقوا يقدسوني ، انا ظهرت



في أشكال كثيرة وباسماء كثيرة ، كانت سيطرتي قوية.

قال الشيخ حسان:

- ده كان زمان لكن دلوقتي الوضع مختلف.

امتلك الغضب من ظل الشيطانة وعلى اصوات صراخ غضبها اهتزت الأرض من أسفل الشيخ حسان الذي مازال واقفا ثابتا ، فطارت الشيطانة بسرعة كبيرة الي الشيخ حسان الذي فجأة رفع يده اليمنى أمامه وهو وهو يتمتم بكلمات غير مسموعة فهبت رياح شديدة جعلت الشيطانة تلتف بجسدها في الهواء وتسقط على الأرض ، فوقفت الشيطانه ومدت يدها في الهواء لتمسك برمح مدبب اسود اللون ظهر فجأة ثم ألقت به بقوة في اتجاه الشيخ حسان الذي التقطه والتف به بقوه وسرعة والقاء باتجاه الشيطانة ليستقر في قلبها فوقعت على الأرض ، فاقترب منها الشيخ حسان وأخذ يتمتم ببضع الكلمات بصوت هامس فبدأ جسد الشيطانة يشتعل بنيران عملاقة ، نيران تصاعدت الي أن وصلت إلى سقف القاعة ، وكأنها تريد التأكد من أنها أحرقت تلك الشيطانه نهائيا بدون رجعة.

وبعد قليل قد هدأت النيران واخذت تاركة الأرض تخرج دخان اسود خلفها فقال

الشيخ حسان :

- دي نهايتك يا لاماتشو.

\*\*\*

كانت هناء واقفة بين وليد وأيمن في غرفة صغيرة وإمامهم كانت عبير جالسة على كرسي مذهب وعلى يمينها كانت ذات الملامح الآسيوية وعلى اليسار كانت ذات الملامح الأوروبية تسكب شئ ما احمر اللون في كوب نحاسي ، ثم قدمته الي عبير



التي جرعته مرة واحدة ثم نظرت إلى الثلاثة الواقفون أمامها وقالت :

- كان من الغباء انكم تحاولوا تكشفوني

قال أيمن :

- عبير .. احنا صحابك .. احنا شغالين مع بعض في جريدة واحدة وفي ما بينا

عشرة وود .. ازاي تفكرى انك تأذينا؟

ضحكت عبير بصوت عالي وقالت :

- يا حرام .. تصدق صعبت عليا ؟!

ثم قالت بغضب :

- كل الي حاول يكشفني قتلته وشربت دمه .. انتم متعرفوش قيمة الدم ، الدم

ده عنده اسرار البشرية والكون كله ، الدم هو وقود الحياة عموما .. ممكن تكونوا

كسبتوا معركة لما قتلوا غول من غيلاني وقفلتوا البوابة الي قعدت سنين طويلة

لحد ما عرفت افتحها ، لكن المرة دي أنا هفتح سجن الغيلان والحرب هتنتهي

بانتصاري انا ، وانا دايمًا الي هفضل منتصرة .

فجأة سمع الجميع من خارج الغرفة طلقات نارية كثيرة وخطوات الاقدام المسرعة

بين طرقات القصر ، فأشارت عبير برأسها الي ذات الملامح الآسيوية بأن تخرج

لتعرف ماذا يحدث ، وما أن فتحت ذات الملامح الآسيوية الباب وأخرجت رأسها

فاستقرت فجأة رصاصة فيها فسقطت على الأرض مما جعل الجميع يشعر بالفرع

حتى عبير نفسها ، بعدها دخل رجلان ضخمان يحملان اسلحتهما النارية وخلفهم

كان حسن المهدي يسير في قوة ، الي أن أقترب ووقف أمام عبير فقالت ذات الملامح

الأوروبية في غضب :



- انت قد الي انت بتعمله ده يا حسن ؟

اطلق حسن طلقة نارية من مسدسه فاستقرت في راس ذات الملامح الأوروبية فسقطت صريعة ، فشهقت عبير وارتعدت ثم قالت بتوتر :

- اسمع يا حسن .. انا ممكن اعفيك عن خدمتي وهسلمك كل الضمانات الي تثبتلك اني مش هتعرضلك تاني ، غير اني هعوضك بفلوس ونفوذ وحريم وو...  
لم تكمل عبير حديثها بسبب الطلقة النارية التي استقرت في رأسها هي أيضا والتي كانت من مسدس حسن ، بعدها قال حسن الي وليد :

- كانت فكرة الجي بي اس دي كويسة يا وليد ، شكرا انك ساعدتني على اني اخذ بتاري منها.

هز وليد رأسه وهي يحتضن هناء التي رأت في تلك الليلة الكثير من الدماء والجثث ، أما ايمن فقد كان ينظر الي جثة عبير ودموعه تتساقط من عينيه في هدوء ، لاحظ وليد هذا فاقرب منه وربت على كتفيه ، فنظر له ايمن والألم والحزن يمزقه من الداخل والخارج وقال :

- انا حبيتها .. حبيتها بجد يا وليد .. لكن في الاخر طلعت شيطانه ضحكت عليا بضحكتها وجمالها

قال وليد وهو يحاول تهدئته :

- ضحكت علينا كلنا يا ايمن .. مش انت لوحداك.

هز ايمن رأسا نافيا والدموع تتساقط من عينيه ، ثم قال وهو يضرب بيديه تجاه صدره :

- لأ يا وليد ، لأ .. دي ضحكت على قلبي ... على قلبي أنا مش على قلبكم



اقتربت هناء من ايمن هي الأخرى وربتت على كتفه فنظر لها ايمن وقال :  
- بس الغلط مش عليها يا هناء .. الغلط عليا انا اني حبتها وعشقتها .

تنحني حسن المهدي وقال :

- انا اسف يا استاذ ايمن بالرغم اني مش فاهم في ايه ، لكن يا جماعة احنا لازم  
نمشي دلوقتي وحالا .. رجالي بيزرعوا متفجرات في كل مكان علشان هنمحي المكان  
ده كله من الوجود.

\*\*\*

بعد مرور يومين كان وليد يقود سيارته وبجواره كان ايمن الذي تغير تماما عن ايمن  
الظريف الذي يلقي نكاته من الحين والآخر فقال وليد :

- تفتكر المدير هيخصم مننا الايام دي كلها ؟ احنا ده اول يوم ننزله من ساعة ما  
كنا في الصعيد.

قال أيمن :

- التقرير الي كتبناه سوا امبارح في شقتك وبعتهنا على ايميل الجريدة هيخليه  
يدينا مكافأة ، مش يخصم مننا ، وبعدين هو بيدفع حاجة من جيب أمه ، ده كله  
من جيب الاعلانات الي نازله على الجريدة زي المطر.

قال وليد :

- حكاية أن احنا شلنا اسماء الناس الي اتورطوا غصب عنهم في قضايا سرقة  
الاعضاء وتهريب الآثار وتجارة البشر والأطفال دي كانت فكرة حسن ، تفتكر يا  
ايمن أنها فكرة كويسة ؟



قال ايمن في هدوء وبملامح ثابتة :

- مش لازم نحاسب ناس مكنتش في أيديهم اي حيلة ، ناس اتورطم بالغصب واضطروا أنهم يستمروا في الأعمال دي علشان حماية أسرهم متنساش أن الناس دي هي الي ساعدتنا أننا نكشف أعضاء باقي العصابة دي واخدنا منهم اوراق تكشفهم وتطورتهم اكثر واحنا كل الي عملناه أن احنا اعتبرناهم شهود ملك ، زي المحكمة كده ، وخطينا بس أعضاء العصابة الاساسين والي كانت بتحركهم ... لم يستطع ايمن أن يذكر اسم عبير على لسانه ، فمازال الالم والحزن يسيطر على قلبه الذي لم يستطع نسيان كل الذكريات والأحداث ، ففهم وليد رد فعل ايمن فقال محاولا تغيير الموضوع :

- بس شوفت لحظة الانفجار عاملة ازاي ؟

قال أيمن وهو يبتسم ابتسامة صغيرة :

- الناس الي سمعت صوت الانفجار افكروا أن دي فردة كاوتش تريلا ضربت على الطريق .

ابتسم وليد وقال :

- هناء النهاردة جايبلنا فطار على حسابها.

هز ايمن رأسه في فهم وظل صامتا وهو ينظر إلى الطريق شاردة في تفكيره وذكرياته ، وما أن وصلوا الي الجريدة ودخلوا إلى مكتبهم فوجدوا هناء جالسه تتصفح الجريدة وما أن راتهم قالت :

- شوفتوا التقرير الي احنا نشرناه .. مكسر الدنيا وكل مواقع التواصل الاجتماعي بتتكلم عنه .



قال وليد :

- ده نجاح لينا كلنا يا هناء.

فجأة دخلت عبير المكتب وما أن لمحتهم حتى ابتسمت لهم والقت عليهم التحية وهي تقول :

- حمدالله بالسلامة .. وحشتوني .. عاملين ايه ؟

نظر الثلاثة لها في دهشة ورعب ، فقد كانت منذ يومين قتيله أمامهم وجثتها على الأرض اثر رصاصة قد استقرت في رأسها ، فقال ايمن :

- انتي ؟! .. تاني ؟!

ثم نظر الي وليد وقال :

- ازاي ؟!

نظرت لهم عبير وعلى ملاحظها علامات الحيرة والتساؤل فقالت :

- في ايه يا جماعة مالكم كده كأنكم شفتم عفريت؟

قالت هناء وهي تنكمش خوفا وراء وليد :

- حرفيا احنا شايفين عفريت قودامنا.

نظرت لهم عبير وقد شعرت بالخجل ثم ذهبت وجلست على مكتبها وقد سقطت دمعتين من عيونها أمام ايمن الذي كان ينظر إليها وقد بدأ قلبه ينبض بقوة ، فجأة رن هاتف وليد المحمول فأجاب وبعد قليل اغلق الخط وهو ينظر إلي هناء وايمن وقال :

- الي كان بيكمني ده الشيخ حسان وقال لي أن الي قودامنا دي عبير زميلتنا الي

احنا نعرفها والي جتلنا الصعيد ، اما الي قتلها حسن المهدي فهي كانت واحدة ش بها.



قالت هناء وهي تنكمش خوفا وراء وليد :

- حرفيا احنا شايفين عفريت قودامنا.

نظرت لهم عبير وقد شعرت بالخجل ثم ذهبت وجلست على مكتبها وقد سقطت دمعتين من عيونها أمام ايمن الذي كان ينظر إليها وقد بدأ قلبه ينبض بقوة ، فجأة رن هاتف وليد المحمول فأجاب وبعد قليل اغلق الخط وهو ينظر إلى هناء وايمن وقال :

- الي كان بيكلمني ده الشيخ حسان وقالى أن الي قودامنا دي عبير زميلتنا الي احنا نعرفها ، اما الي قتلها حسن المهدي فهي كانت واحدة شبةا.  
قالت هناء باستغراب :

- والشيخ حسان عرف منين الي بيحصل دلوقتي.  
هز وليد كتفه وهو يقول :

- معرفش .. بس هو قالى أن هو ساب معانا حراسة تحرسنا لاي قضية تانيه بعد كده

أما ايمن الذي نظر له بدهشه ثم تمعن في التفكير وبعدهت سار الي عبير يتفحص وجهها ، كانت عبير تحاول حبس دموعها اثر الخجل والأسلوب التى تعرضت له منهم ، كان ايمن ينظر في عيونها يتفحص لونها ثم رموشها وحواجبها ثم سقط بعينه الي رقبتها الي أن تذكر شيئاً هامة ، تلك الشامة التى في رقبتها والتى تشبه نقش سمكة صغيرة ، تلك الشامة لم تكن موجودة عند عبير التى قتلت في القصر ، لقد فحص الجثة جيدا ولم يراها ولم يعطي لها اهتماما اثر حزنه على موتها ، وهنا تأكد ايمن أن من قتلت في القصر هي امرأة تشابهت في الشكل مع





عبير زميلتهم في الجريدة .. عبير التي أحرقت قلب أيمن حبا وشوقا وحزنا عليها.  
 هنا انقض ايمن على عبير يحتضنها بقوة واجهش في البكاء ، أما عبير التي كانت  
 متخشبه خجلا مما يفعله ايمن وهي تنظر باندهاش الي هناء ووليد وتشير بيدها  
 متسائلة عما يحدث ، ضحك وليد وهناء وهم ينظران الي بعضهما البعض ثم قالت  
 هناء :

- بعدين هحكيلك يا عبير ..

ثم أمسكت بحقيبة بلاستيكية وقالت :

- يالا بينا نفطر

ثم نظرت إلي وليد وقالت :

- وبعد الفطار عليك يا معلم تعز منا في أي مكان علشان نحتفل احنا الأربعة سوا.

\*\*\*



## الخاتمة

بعد مرور سنة

كانت عبير وهناء ترتديان فساتين العرس يرقصون سويا بجوار ازواجهم ايمن ووليد ويلتف حولهم الأصدقاء والأهل والاحباب في قاعة كبيرة صممت خصيصا للافراح ، وبعد الرقص والاحتفال جلس الأربعة لتناول الطعام فاقترب منهم أحد الأشخاص ممسكا بهدية في يديه واقترب منهم وقال :

- اسف يا عرسان .. بس في حد جه وسبلكم الهدية دي .

نظرت هناء إلي عبير وقالت متسائلة:

- هدية ؟! .. من مين ؟

هزت عبير رأسها بأنها لا تعرف فاخذها ايمن وفتحها فأخرج منها تمثال صغير كان التمثال بجسد مشعر ورأس أسد مع أسنان بارزة حادة وأذني حمار، وأصابع وأظافر طويلة وأقدام طير مع مخالب، وكانت معه ورقة صفراء صغيرة ملفوفة ، ففتحها ايمن فوجد بداخلها كلمة كتبت بحروف قبطية من ثمان احرف وتحتها كتبت كلمة عربية وحيدة.

نظر ايمن إلي الورقة باندهاش وتوتر ثم أعطاها الي وليد الذي اخذها وجلس ينظر إليها فوجد مكتوب فيها :

" MICALINA " قادمة "

\*\*\*



تمت بحمد الله

أحمد عبد الحميد

25 مارس 2025



## اعمال اخرى للكاتب

- ثلاثية لعنة الزمردة      نشر إلكتروني
- رواية تعويذة الحياة      نشر إلكتروني
- رواية نباش المقابر      نشر إلكتروني
- كتاب الحشاشين      نشر إلكتروني
- سلسلة الموت الأسود      نشر إلكتروني
- رواية سيدة بكة      نشر ورقي
- رواية ميسالينا      نشر إلكتروني

